

# نصل و نش

دینا مختار







## جميع حقوق الطبع والنشر محفوظة

يحظر طبع أو نشر أو تصوير أو تخزين أي جزء من هذا الكتاب بأي وسيلة إلكترونية أو ميكانيكية أو بالتصوير أو خلاف ذلك إلا بإذن كتابي من الكاتبة فقط

[dina.mokhtar2019@gmail.com](mailto:dina.mokhtar2019@gmail.com)

الترقيم الدولي : 978-977-94-5043-8  
رقم الايداع : 2023/7251  
الطبعة الأولى : فبراير 2023



## الإهداء

- إلى أمي و أبي :
- أهدي إليكم أول مولودة لي ، أن لكم أن تفرحوا بحفيدتكم ( نُصْ وَشْ )
- إلى الطائر الذي سكن قلبي ولم يسكن قفصاً قط ، إلى من سيكبر و يترعرع في قلبي وسيظل يسكن قلبي ما حييت ، إلى ( تيتو )
- إلى حبيبتني وساكنة قلبي الأولى ، إلى من عشت معها أجمل أيام حياتي ، إلى من أطمئن على نفسي بمجرد أن اسمع دعواتها ، إلى حبيبتني وجدتي : لولا





## مُتَلَمِّمًا

أنا مش قادرة أحبني أصلاً ، كل محاولاتي في إنني أحب نفسي أو حتى أتقبلها فشلت ، كل محاولاتي إنني أحس إن ليا قيمة في الدنيا إتبخرت وبتتبخر مع كل موقف بمر بيه ، بس هم السبب مش أنا .....  
هم السبب.

إلى المتتمرين في كل بقاع الدنيا : عمرك ما هاتطلع فوق لمجرد إنك هاتخلي حد تاني يكون تحت .  
بلاش تشاور علي اللي طول الوقت الناس بتحاول تداريه

إلى الذين وُجِّهت إليهم الكلمات اللاذعة ، ولم تكن لديهم ملكة الرد : إقتناعك بنفسك هو أكبر رد على أي  
إنتقاد منهم

أعلم أن الصمت هو وسيلة التعبير عن الحزن والسعادة ، القبول والرفض ، الممنوعات والمرغوبات ، إلا  
أن الصمت في هذه الحالة لن يؤدي بك إلا إلى مزيد من الآلام : فاصرخ  
إلى قارئ العزير : إخترت أن تكون هذه الرواية بالعامية وتحديداً اللهجة المصرية لأن معظم سكان الدول  
العربية يستطيعون فهمها ، ( وهو مين يعني مايبحبش مصر )

دينا مختار

## الفصل الأول

### في مكان هادي جداً

أمير قاعد في أوضته اللي مفيهاش اي حاجة غير السرير والدولاب والكومودينو ، حتى الشباك ممنوع يتفتح والباب بيتقفل عليه من برة كمان ، آه ما هو عنده حمام في الأوضة هايغوز إيه من الدنيا تاني .

بيقوم يجيب النوت اللي بيكتب فيها ، ويكتشف إنها متغيره ودي نوته جديدة مش مكتوب فيها أي حاجة ، بيحاول يفكر مين اللي إتجرأ وفتح النوت بتاعته لأ وكمان غيرها وحط له مكانها نوت فاضي لكن للأسف ماوصلش ولا هايوصل للي عمل كدا ، إختصر على نفسه ومافكرش كتير وقرر إنه هايفتحها وهايكتب فيها بدل بتاعته اللي إتبدلت .

فتح على أول صفحة ولسه بيمسك القلم عشان يكتب  
لفت نظره كلمة مكتوبة في آخر سطر من الصفحة والكلمة دي مكانتش غير ( بحبك يا أميري )

-----

في مكان تاني أشبه بقصور الفراعة ، بتنزل بنت من على السلم الداخلي للبيت وبتقابل باباها اللي نازل في نفس الوقت .

ملك ( بحب ) : صباح الخير يا بابا

مهدي : صباح النور يا قلب بابا ، ياللا تعالي إفطري معايا

ملك : لأ مش هالحق عندي محاضرة ومتأخرة جدا

مهدي : ماشي حبيبي إبقى طمئيني عليك وخلصي محاضرات وتعالى على طول

ملك : طب بابا بعد إذتك أنا عايزه أعدي على أمير بعد المحاضرة أتطمئن عليه

مهدي : ماتروحيلهوش لوحداك إبغي إتصلي بيا وأنا آجي معاكي

ملك : بس أنا عايزه أقعد معاه ونتكلم يا بابا ، من فضلك سيبنى براحتي

مهدي ( بزهدق ) : إعملي اللي تعمليه

ملك : شكرا يا بابا ربنا ما يحرمننا منك أبدا يارب

وباسته على خده وراحت ناحية الباب ونزلت فعلاً .

-----

في كلية الآداب جامعة القاهرة

ملك قاعدة مع أصحابها حور و رقية

حور : بس هانعمل إيه في مشروع التخرج يا ملك

ملك : هو محدش قاعد غيري مثلاً ، هاعمل اللي هاتعملوه إنتو الإيتين

رقية : عادي يا بنتي إنتو مكبرين الموضوع ليه هانروح المستشفى ونعمل مشروعنا على أي حالة من

الحالات ، الموضوع ممتع جداً

ملك : طب تفتكري نروح فين يا روكا

رقية : أعتقد مستشفى العباسية كويسة وفيها حالات كتير نقدر نختار لكل واحده فينا حاله نشتغل عليها

حور ( بخضة ) : لأ المستشفى دي لأ

ملك ( باستغراب ) : ليه يا بنتي دا أنا حتى أمير اخويا فيها وأهو أبقى أتظمن عليه كل ما نروح

حور ( بدموع ) : قلت المستشفى دي لأ ، عايزين تروحوا روحوا إنتو ، وقامت تمشي بسرعه

رقية وملك ( باستغراب ) : مالها دي

-----

على كورنيش النيل

حور بتتمشى لوحدها وبتعيط لما بتفتكر حياتها من حوالي 9 سنين

## فلاش باك

حور بتصرخ جامد وبتقول للدكتور خرجني من هنا أنا مش مجنونه إنتوا اللي إتجننتوا لما صدقتوهم وكذبوني ، خرجوني من هنا أنا مش دا مكاني

وبتفضل تصرخ لحد ما الدكتور بيديها حقنة منوم وبتنام

وبتفوق حور من تفكيرها على صوت حد بيقولها : إنتي كويسة يا حور

حور : آه يا عم محمد أتظمن أنا كويسة ماتقلقش

عم محمد : مش باين عليكي خالص وشك دبلان وأصفر زي اللمونة إيه اللي عامل كدا فيكي يا بنتي

حور ( بتهتة ) : مش عارفة أناااا - أنا كويسة كويسة

ومشيت بسرعه من قدامه وهي بتعيط

-----

## عند أمير

فضل ماسك النوت وباصص فيها قوي وبيكلم نفسه بصوت عالي ، بتحبيني وأميرك وأخذتي النوت بتاعي ، إنتي مين وتعرفي عني إيه عشان تحبيني ، إنتي بتكدي .

ومسك الورقة اللي مكتوب فيها وقطعها وقرر إنه هيكتب في الصفحة اللي بعدها

ولكن المفاجأة إن كل صفحات النوت كان مكتوب فيها نفس الجملة في نفس السطر من كل صفحة .

إتهد أمير باستغراب وهو بيقول لنفسه : تحبني ولا ماتحبنيش بقي هي حرة ، مفيش حل قدامي غير إني

أكتب في النوت دا لأنني ماقدرش ماكتبش ، هاكتب ، لكن هاكتب إيه ؟

مسك أمير فعلا القلم عشان يكتب اللي هو حاسس بيه زي ما بيعمل دايمًا لكن لقي نفسه بيكتب في السطر

اللي قبل الأخير من الصفحة ، وأنا بحبك يا ...

يا إيه ، بتحب مين ، إنت عارف تحب نفسك عشان تحب حد

قطع أمير الصفحه دي كمان ومسك القلم عشان يكتب اللي حاسه ويرتاح من كل الوجع اللي مبيعرفش  
يخرجه غير على هيئة كلام مكتوب

أنا نفسي أخرج من هنا ، ماليش ذنب في كل الي حصل ، أنا كنت قاصد خير ، أنا مش عايز كدا ،  
أنا تعبت ، أنا بكرههم ، هم كرهوني في نفسي ، هم وجعوني ورموني ، أنا بحبها ، لا محبهاش ،  
أنا مش عارف .

وبعد ما كتب الكلام دا قفل النوت وضلم النور وقرر يغمض عنيه يمكن يقدر ينام .

-----

### في مستشفى العباسية للأمراض النفسية

بتقف ملك عند الأوضة اللي موجود فيها الدكتور المسؤول عن حالة أمير وبتخبط على الباب

سيف : أدخل

بتدخل ملك وبتقول للدكتور ( بإبتسامه مالية وشها ) : دكتور سيف أخبارك إيه ؟

سيف : الحمد لله يا آنسة ، طبعا عايزة تسألني عن أمير صح ؟

ملك : آه آه طبعا عن أمير ، هو كويس

سيف : مفيش أي تغيير خالص في حالته ، من يوم ما جه المستشفى وهو زي ما هو كدا ،

4 سنين وأنا بحاول معاه ومفيش أي فائدة ، أنا مش هاقدر أعالجه أبدا غير لو قرر يتكلم ،

وهو مبيتكلمش ولا بيحكى أبدا ، وماجالهوش زيارات خالص ولا حد بيسأل عنه من يوم ما جه غير حضرتك

بتيجي تسألني عليه وتمشي من غير حتى ما تشوفيه ، ودا مسبب له آذى نفسي كبير جدا ،

حاسس إن الكل ما صدق يخلص منه ، ياريت تدخلني له وتبلغني والدك يزوره ، هو محتاج لكم جدا

ملك ( باستعجال ) : ماشي يا دكتور ، شكراً لحضرتك

سيف : تحبي تدخلني له

ملك : مرة تانية إن شاء الله

سيف ( بقرف ) : براحتك

بتمشي ملك من قدام الدكتور وهي بتقول لنفسها : قال أمير قال ، أنا جايه عشان أشوفك إنت وفي الآخر  
تكلمني كدا

وبتخرج من المستشفى وبتروح البيت .

-----

عند حور

فضلت حور تعيط كثير جدا وهي في مكانها وخرجت من شنطتها ورقة صغيرة كتبت فيها أمنية كل ما  
بتيجي المكان دا بتتمناها قبل ما تمشي ، كتبت الأمنية في الورقة وطبقتها كويس جداً ورمتها في الماية وقالت  
بصوت كله وجع : ياااa

بصت على الساعة واكتشفت إن الوقت متأخر ولازم ترجع في ميعادها يا إما النتائج هي عرفها كويس .  
فتحت موبايلها اللي هي قافلاه من لما سابت ملك ورقية في الكلية واتصلت برقم هي حافظاه في قلبها قبل  
دماغها

الإتصال خلص ومحدث رد مرة وإثنين وثلاثة و10 ، لحد ما القلق إتمكن منها وقررت تغير وجهتها وحتى  
لو اتأخرت اللي يحصل يحصل .

فضلت ماشية وهي مش مركزة في أي حاجه غير ليه مبيردش ، يا ترى هو بخير ، أكل ولا لأ ، نام ولا لسه  
صاحي .

أفكار كثير فضلت تطاردها لحد ما فجأه شافت عربية جايه سريعه جدا وهي زي ما تكون إتشلت مكانها ،  
مش عارفه تتحرك عشان تبعد عن العربية ، ولا قادرة تتحرك من مكانها اصلاً ، وحست إنها النهاية ،  
وفعلا العربية خبطتها ووقعت في الأرض ، وقبل ما تغمض عنها صرخت بكل صوتها : أميريبي .

## الفصل الثاني

### عند أمير

صحي فجأه من النوم وهو مخضوض وبيقول أعوذ بالله من الشيطان الرجيم أعوذ بالله من الشيطان الرجيم ،  
ويحط إيداه على قلبه ويحاول إنه يهدا وبيقول لنفسه وصوته بيترعش جداً : متخافش يا أمير ، إهدا ، مفيش  
حاجه ،  
كله هيبقى بخير ، نام يا أمير نام .

لكن للأسف مبيعرفش ينام ولا يغمض عنيه أبدا

مسك موبايلاه عشان يفتح تطبيق المصحف ويقرا فيه لكن شاف رنات كتير من رقم ميعرفهوش ، إستغرب  
جداً - خصوصاً إنه عارف إن كدا كدا محدش بيسأل عليه ولا بيفكره - وقال لنفسه : يا ترى رقم مين دا وهل  
ليه علاقه بصاحبة النوت ولا لأ ، كل دي رنات دا الرقم رن 12 مرة ، سيبك يا أمير لو عايزك هيرن تاني .

وفعلا تجاهل أمير الموضوع وفتح تطبيق المصحف وقعد يقرا قرآن ووقفت عنيه عند آية

« وَاصْبِرْ لِحُكْمِ رَبِّكَ فَإِنَّكَ بِأَعْيُنِنَا وَسَبِّحْ بِحَمْدِ رَبِّكَ حِينَ تَقُومُ »

فضلت عنيه متعلقة بالآية دي وفضل يقرأها بصوت عالي كتير ، حاضر هاصبر يارب وواثق إن عوضك  
هيجبر بخاطري ، وفضل يقرا الآية لحد ما عنيه راحت في النوم .

### عند حور

الناس إتلمت في الشارع وأخدوها على أقرب مستشفى والخبطة كانت سطحية جدا لكنها مش بتقوق ،  
ومفيش أي سبب عضوي يؤدي لكده ، السبب الحقيقي هو إنها رافضة ترجع ، مش متقبلة الحياه ،  
إستسلمت للنهاية دي وهي راضية جدا بيها .

الدكتور بيكلم واحده ست كانت جاياه معاها في الإسعاف

**الدكتور:** هي كويسة لكن في حاجة مخليها رافضه تفوق ، مش عايزة ترجع للحياه ، هي بنتك

**الست :** والله يابني ماعرفها اصلاً أنا لقيتها في الشارع واقعه فاستحرمت أسيبها لوحدتها فجيت معاها

**الدكتور:** ربنا يجازيكي خير يا حاجة ، طب كان معاها شنطتها أو موبايل أو بطاقة أو أي حاجة نقدر

نوصل لأهلها عن طريقها

**الست:** والله ما اعرف أنا انشغلت بيها ومخدتش بالي

**الدكتور:** طيب خير إن شاء الله

**الست:** أنا هستأذن بقي يابني عشان أنا باجري على رزق عيالي ، ربنا يقومها بالسلامة يارب ،

بس خلي بالك منها بالله عليك ، وأنا هابقى آجي أتطمئن عليها تاني .

**الدكتور :** كتر خيرك يا حاجة

## يوم جديد ومكان جديد أول مرة نروحه

دار الأمل لرعاية الأيتام ، كانت الدار دي خاصة بالبنات من سن 18 سنة

صحيت هاجر من النوم ملقتش حور في السرير اللي جنبها ، إستغربت جداً وبدأت تقلق لأن حور مش بتترد

عليها من امبارح ، مسكت موبايلها وحاولت تتصل برقم حور لكن حور موبايلها إنتقل ،

هاجر قلقت أكثر ونزلت للمشرفة المسئولة عن التأخير بتاع البنات عشان تسألها عن حور .

**هاجر:** ميس بسمة بعد إذتك هي حور رجعت إمبارح ولا لأ

**بسمة (بخضة ) :** ليه هي حور مش فوق

**هاجر:** أنا بسأل حضرتك لأنها فعلا مش موجودة وموبايلها مقفول ، وأنا بصراحه قللقانه عليها جداً

**بسمة ( بخوف ) :** خلاص روعي يا هاجر وأنا هاتصرف إن شاء الله



مشيت هاجر من قدام بسمه وهي بتفكر وبتقول لنفسها : يا ترى حور فين دي مالهاش حد غيرنا هتروح فين بس ؟ ربنا يستر ومايكونش جرا لها حاجه ، إسترها يارب .

-----

### في بيت مهدي الخيال

**مهدي** ( قاعد في مكتبه وبينتكم في التليفون وبيزق بصوت عالي ) : يعني إيه مش لاقينها

**الشخص** : والله يا فندم هي معروف عنها إنها مبتتأخرش أبداً فـ مشرفة التأخير كتبتها إنها موجودة

وماعرفناش بغيابها غير الصبح من صاحبها

**مهدي** ( بعصبية وتوتر ) : وأنا أعمل إيه بكلامكم دا دلوقتي ، إتصرفوا وحوور تظهر لو حتى تحت الأرض

**الشخص** : إحنا فعلاً بنحاول يا فندم لأنها مسئوليه كبيرة علينا بس إحنا عايزين نفهم من حضرتك ،

هل هي أيها حد ممكن تروحه أو حد ممكن تلجأ له

**مهدي** ( بنفي ) : لا مفيش حد ، واحده متعرفش مين أمها وأبوها هيقالها مين بس

**الشخص** ( بحيرة ) : مش عارفه والله يا فندم ، بس بإذن الله هنلاقيها بإذن الله

**مهدي** ( بدعاء ) : يا ارب تلاقوها يارب

قفل **مهدي** المكالمه مع المسئوله عن الدار ( وقعد حاطط وشه بين ايديه وبيبكي بحسرة وبيقول لنفسه ) :

ياريتني ما عملت فيكي كدا ، بس والله كان غصب عني ، سامحيني يا بنتي ، سامحيني يا حور .

-----

### عند أمير

صحي أمير من نومه إتوضا وصى الصبح وقعد يفكر مع نفسه إيه آخر اللي هو فيه دا ولـ إمتي هيفضل

في مصحة أمراض نفسية وهو ما عند هوش اللي يخليه يتعالج فيها .

لسة هيمسك النوت عشان يكتب فيها صباح الخير لنفسه زي ما بيعمل دايمًا ، أفنكر إن النهاردا معاد جلسته والدكتور هيفضل يحاول يخليه يتكلم وطبعًا زي كل مرة مش هينطق غير كلمة واحده بس ، أنا كويس يا دكتور ماتتعبش نفسك معايا .

مكلمش تفكير لأن الباب إتفتح و الدكتور دخل له فعلاً بإبتسامه صافية جداً وقال له : صباح الخير يا بطل

أمير ( بشرود ) : صباح الخير يا دكتور

سيف : ها إيه أخبارك النهاردا

أمير: الحمد لله

سيف : أمير مين اللي زارتك إمبارح دي

أمير ( بسخريه ) : في الحقيقة محدش زارني يا دكتور شوف إنت متلخبط في أنهي حاله

سيف ( بحيرة ) : إنت متأكد إن محدش زارك يا أمير

أمير ( بتأكيد ) : أيوة يا دكتور محدش جالي

وأفنكر أمير فجأة إن النوت بتاعته إتبدلت وفي فعلاً حد جاله هنا وبدلها وواضح إنها بنت من الرساله اللي

مكتوبة في آخر كل صفحة ، وقال ( بسرعه ) : هو إنت بتسأل ليه يا دكتور ، في حاجه ؟

سيف : أنا شوفت بنت داخلت لك إمبارح الصبح ، شوفتها بعيني وهي داخله عندك

أمير : فعلاً أنا لقيت حاجه عندي مكانتش موجودة بس للأسف معرفش مين دي بجد ،

بس هي دخلت إزاي يا دكتور ؟

سيف : معرفش

أمير: هيبان هيبان

سيف : طيب يا بطل ها مش عايز تحكي حاجه برضو

أمير : يا دكتور صدقني أنا مافيش عندي أي مشكلة ، أنا كويس يا دكتور متتعبش نفسك معايا

سيف ( بقله حيلة ) : ماشي يا أمير ، هستناك وقت ما تحب تحكي وهاجيلك تاني بكرة

أمير : زي ما تحب

خرج سيف من عند أمير فعلاً وسابه في حيرة كبيرة جداً ، يا ترى مين هي البنت دي ودخلت الأوضة عنده  
إزاي وإمتي وإزاي محسش بيها لا وهي داخله ولا وهي خارجه .

بيحاول يهرب من التفكير وبيفتح النوت عشان يكتب فيها لكن بيلاقى ورقة متطبقة جوة النوت ،  
بتلفت نظره وبيفتحها وبيقرا

" أحتاج أن أقول لك كل مميزاتي وأتغاضى عن كل عيوبي الان

أحتاجك أن ترفع معنوياتي بكل ما لديك من قوة

قل لي أنني جميلة ولا يوجد مثلي في الكون

قل لي أنني حنونة وهادئة

قل لي أنني عميقة وذكية وعبرية

قل لي الآن أنني طفلة كبيرة

وفتاة ناضجة

قل لي أنني قوية بل لا يوجد أقوى مني في هذه الدنيا

لا تواجهني بأني هشة كالزجاج بل أضعف

لا تقل أنك ستبتعد كما الباقون

لا تخبرني بعيوبي الآن

فقط أخبرني أنه رغم كل شيء ستبقى أميري

فقط أخبرني أنك لن تتركني

أقول لك ، لا تخبرني شيء

فقط دعني أتشبت بك وأبكي

دعني أبكي فقط

أبكي على كل شيء

أبكي على الذي يؤلمني ولا تعلم عنه شيء

فقط دعني أبكي حتى تتورم عينايا من البكاء

ثم بعد ذلك لا تعطني منديلاً كي أمحي به دموعي

بل عليك محوها أنت يا أميري

لكن إياك ثم إياك أن تتركني بعد الانتهاء من هذا البكاء

، بل عليك أن تبقى معي بقلبك وليس بحضورك

فقط كن معي

وهذا كل ما أتمناه الآن .

بيقرا أمير الورقة كثير جداً ويحاول يفهم إيه هي الرسالة اللي المفروض يفهمها من الورقة دي ،

ويا ترى مين دي وإيه حكايتها ؟

-----

**عند حور**

المرضة بتدخل عليها بتلاقيها عماله تفتح عنيا وتقلها تاني بوجع ،

جريت الممرضه على الدكتور بفرحه وقالت : دكتور دكتور الأنسة اللي في أوضة 112 فاقت

**الدكتور:** أنا جاي حالياً يا سارة عشان نتطمئن عليها

وفعلا لحظات وكان الدكتور في أوضة حور وبكشفت عليها وقال : الحمد لله هي كذا فاقت وكذا اعتقد انها

نايمة أو مرهقة

سارة ( بفرحه ) : طيب الحمد لله ، هاروح أنا أمر على باقي الأوض ، محتاجني هنا دلوقتي يا دكتور

**الدكتور:** لا روعي يا ساره إنتي ولو احتاجتك هأناديكي

مشيت ساره فعلاً ولكن دكتور أدهم فضل واقف جنب حور وبدأ يبص لعيونها ويتأمل ملامحها البريئه اللي بهتانه بشكل مايلقش مع كمية البراءة اللي فيها ،  
**وقال :** الحمد لله إنك فوقتي ، وشد نقابها من على وشها عشان تتنفس بحرية وخرج .

-----

**في أوضة ملك**

ملك بتتكلم في التليفون مع رقية صاحبتها وبتقولها : حور تليفونها من إمبارح مقفول ومحدث عارف عنها حاجه تفنكري ممكن تكون قفلاه ليه  
رقية : عادي ما إنتي عارفة حور بتحب تختفي كدا وتعيش مع نفسها وأميرها الغريب اللي هي مقتنعة إنه موجود دا ، هتلاقيها راجعه بعد يومين تلاته تقولك كنت مع أميري في جزيرته  
ملك ( بضحك ) : ربنا يستر ويكون مفيش غير اللي إنتي بتقوليه دا ، أنا هاسيبك وأنزل دلوقتي هاروح لأمير  
رقية : لـ أمير برضو ولا لدكتور أمير  
ملك : إمشي يا بت من هنا ، سلام

-----

**عند أمير**

جاب النوته بتاعته وقرر يكتب عشان يرتاح ، النهاردا هو مخنوق بشكل زيادة عن كل الأيام ومش عارف السبب

مسك القلم وبدأ يكتب

لا أدري لماذا أنا ، لماذا تختارني رغم ملايين البشر على الكوكب ؟  
لماذا لا يليق الحزن سوى بي ؟ ولماذا لا يليق التخلي سوى عني ؟  
ولماذا لم يعرف الكره حتى الآن طريقا لقلبي ؟

قفل أمير النوت وبدأ يقول: أنا مابقيتش عارف أنا مين بسببكم ، منكم لله ،  
ومسك المصحف وبدأ يقرأ فيه لحد ما عنيه راحت في النوم .

-----

### في المستشفى

خرجت سارة من الأوضة اللي كانت فيها حور وهي بتجري  
وبتنادي دكتور أدهم : دكتور دكتور الحاله بتاعه اوضه 112 مش موجودة

أدهم ( باستغراب ): مش موجودة ازاي !!

سارة : معرفش والله يا دكتور أنا جيت أمر عليها ملقيتش حد في الأوضة

أدهم : طب ماشي يا سارة هانزل أشوف في إيه وربنا يستر

سارة : ماشي يا دكتور هاروح أمر على باقي الأوض

ومشيت ساره من قدامه وهو بيكلم نفسه : هتكون راحت فين بس ، ربنا يحفظها وميكونش حصلها حاجه  
وحشة .

## الفصل الثالث

بتنزل من على السلام وهي مش عارفه هي راичه فين ،  
بتقابل واحد وهي نازلة وبتخبط فيه وبتقوله من غير ما ترفع وشها : أنا أسفة  
بيرد عليها : أعمل بيها إيه أسفة دي ، إنتي مابتشوفيش

حور (بصدمة من طريقته ) : أنا ماخدتش بالي معلش وبعدين أنا إعتذرت ، ليه الطريقة دي

أدهم ( باستغراب ) انها ماتعصبتش عليه زي ما بيحصل في الأفلام : ولا يهكم ، إنتي كنتي بتزوري حاله  
فوق ولا إيه ؟

حور: لا أبدا أنا كنت تعبت وجابوني هنا إمبارح بس خفيت الحمد لله فقلت أمشى

أدهم ( بصدمة ) : إنتي

حور ( باستغراب ) : أنا إيه مش فاهمة !!

رفع أدهم عنيه وبص لعيونها واكتشف إن حور هي نفسها الحاله بتاعه أوضة 112 ،  
حاول يسيطر على أعصابه عشان مايتعصبش وإستغفر في سره وقال لها : إنتي إزي تنزلي من غير ما يتكتبك  
إذن خروج هو إنتي ماشية بدماعك وخلص ، ولا مش عايزة تدفعي حساب المستشفى

حور ( بدموع ) : أنا معرفش أنا جيت إزاي ولا أعرف حتى شنطتي وموبايلي فين وفعلاً أنا مش معايا فلوس  
أدفع حساب المستشفى ، أنا آخر حاجه فكرها لما العربية خبطتني وبس ، ثم إنت مالك أصلاً إنت مين إنت  
عشان تكلمني كدا

أدهم : أنا دكتور أدهم الشافعي ، رئيس قسم الطوارئ والدكتور المتابع لحالتك

حور : طيب أنا هاخرج و والله هارجع لحضرتك بحساب المستشفى تانى بكرة ، بس أنا فعلاً معرفش  
شنطتي فين ولا معايا أي حاجه أديها لك دلوقتي

ادهم عارف كل دا ودفع ليها الحساب من الصبح لكن ميعرفش هو بيشاكس فيها ليه ،  
وليه هي صعبانة عليه كدا وهو أصلاً ميعرفش حاجة عنها ???

أدهم : طب تمام بس أنا ممكن أديكي موبايلي تكلمي حد من أهلك يجي لك عشان ماينفعلش تمشي لوحدهك ، إنتي لسه تعبانة

حور وهي مسمعتش من كلامه ولا كلمة بعد كلمة تكلمي حد من أهلك وبدأت الكلمة تتردد في ودانها ودماعها لفت لكنها رفعت وشها بسرعه وبتحاول تبان قوية : شكراً يا دكتور أنا كويسة ، عن إذنك وسابته ومشيت بسرعه جداً وفضلت تجري لحد ما خرجت من المستشفى خالص ، و أدهم بيبيص عليها ومستغرب تصرفها جداً ويقول لنفسه : هو أنا قلت حاجه غلط ، هي البت دي هبلة ولا إيه .

\*\*\*\*\*

### في مستشفى العباسية للأمراض النفسية

بتوصل ملك المستشفى وهي لابسة أجمل حاجه عندها وعاملة أحلى ميكآب وقبل ما توصل لمكتب دكتور سيف بتدور بعنيها لحد ما بتلاقي المراهيه وبتتأكد من شكلها الأول وبتلاقي كل حاجه زي ما هي عايزه فبتقرر تخبط على باب مكتب دكتور سيف وبتخبط

سيف : أدخل

ملك ( برقه ) : دكتور سيف أخبارك إيه

سيف ( بزهبق ) : الحمد لله ، خير يا آنسة في حاجه

ملك ( وهي مش عارفة تعمل إيه ولا تقول إيه ) : آه آه أنا عايزه أشوف أمير

سيف ( بفرحه ) : طبعاً طبعاً دا هايفرح أوي لما يشوفك

ملك : إن شاء الله ، ممكن تيجي معايا

سيف : حاضر هاوصل حضرتك من عنيا

واخذها سيف لحد الاوضة وفتحها المفتاح وخبط خبطتين على الاوضة وسابها ومشى

ملك : رايح فين خليك معايا



سيف : هاسيكم براحتكم ، عن اذنك

وسابها ومشى ومادالهاش فرصة ترد

ملك بقله حيلة خبطت خبطتين على الأوضة ومحدث رد عليها فقررت تدخل

دخلت ملك الأوضة وكان أمير قاعد باصص في السقف وماحشش بدخولها خالص

ملك : أمير .... أمير

ملك ( وهي بتهزه ) : أمير

أمير ( بخضه ) : كوكو عاملة إيه وحشتيني أوي ، إنتي جيتي إمتي

ملك ( بلا مبالاه ) : الحمد لله يا حبيبي أنا قلت آجي أتظمن عليك

أمير : بابا كويس يا ملك

ملك : كويس جداً خلي بالك من نفسك يا أمير وأنا هابقى آجي لك تانى

أمير : إنتي هاتمشى بسرعه كدا ، خليكي شوية إنتي وحشانى اوي

ملك ( باستعجال ) : معلش مرة ثانية يا أمير هابقى آجي لك تانى

وباسته على خده ومشيت من غير ولا كلمة زيادة

\*\*\*\*\*

**عند حور**

بعد ما خرجت من المستشفى وقفت ثواني تفكر تروح فين دلوقتي ، زمانهم في الدار قالبين الدنيا عليها ،  
طب وأمير ، هي قلقانه جداً عليه ، وخذت القرار بسرعة جداً ، هاتروح الدار تاخذ فلوس وتشوف هتعمل إيه  
وبعدين تروح لأمير .

حور بتوقف تاكسي وبتقوله على المكان لكنها بتقوله اللي حصل معاها باختصار وانها مش معاها فلوس  
تحاسبه ، ف بيوافق وبيوصلها للمكان ، وبعد ما بتوصل

حور ( بشكر ) : الف شكر ربنا يجازيك خير يارب

السائق : عفواً يا بنتي ربنا يراضيك ويجبر بخاطرك

وسابها وكمل طريقه وهي بتدخل الدار بتلاقي الكل قلقان جداً عليها والمشرفات ببسألوها طبعاً عن سبب غيابها ، وبتحكي السبب لكل حد بيقابلها تقريباً وبتطلع أوضتها بعد كم أسئلة مالوش آخر .

---

عند أمير

بعد ما ملك مشيت من عنده قعد يكلم نفسه بصوت عالي : ليه كدا يا ملك ، دا لما أبوكي ومراته سافروا وسابوكي من إنتي لسه 6 سنين وإنتي معايا وأنا اللي باربيكي ، إتحديتهم كلهم عشان أعالجك وتبقي طبيعية زينا وفي الآخر هي دي المعاملة اللي استاهلها ، بس مش بإيدي إنتي مش أختي بس أنا كنت بشوفك بنتي والأب مستحيل يكره بنته .

ومسك النوت بتاعه وبيكتب فيه : لو كنت عارف إنتي مين كنت أكيد هحاول أحبك ،  
يمكن إنتي الوحيدة اللي بتحسسيني بإهتمامك ، يارب دلني عليها ، يارب أجبر بخاطري ، يا اارب .

\*\*\*\*\*

عند ملك

بتدخل ملك البيت وبتلاقي باباها مستنيها وبيقولها : غيري هدومك وتعاليلي يا ملك

ملك : حاضر

بتغير ملك هدومها بسرعه وبتدخل المطبخ تعمل عصير وبتدخل لباباها مكتبه

ملك ( بإبتسامه ) : وعملت لك عصير الفراولة اللي بتحبه ، ها بقى مالك عايزني في إيه

مهدي ( بهدوء ) : إقعدني يا ملك

ملك استغربت جدا وقعدت على الكرسي قصاد مكتب باباها وقعدت تسمعه بتركيز

مهدي قاعد يفكر هيبداً منين وهيقول لها إيه وهل دي خطوة صح ولا غلط

ملك : في إيه يا بابا إنت ساكت ليه قلقتني

مهدي : إسمعيني كويس يا ملك ، وحاولي ماتستغريش من أي حاجه هاقولها لك بس أرجوكي اللي هاقوله

دا هيكون سر

ملك : حاضر يا بابا خير في إيه

مهدي : حور يا ملك

ملك ( باستغراب ) : حور مين يا بابا إنت تعرف حور صحبتي منين ، هي جرالها حاجه ولا إيه ، في

إيه ماتلقنيش

مهدي : حور تبقى أختك يا ملك

\*\*\*\*\*

عند حور

بتفتح عنيا على صوت هاجر وهي بتقولها : حور إنتي بخير طمنيني عليكي أنا إتصلت بيكي كتير أوي ،

إنتي كنتي فين ؟

حور : ماتلقنيش يا جوجو أنا كويسة

هاجر : طب إنتي طبعا ما أكلتيش ، أنا هانزل حالاً أجيب الأكل بتاعي أنا وإنتي وناكل مع بعض هنا

حور ( بتعب ) : ماتتعبيش نفسك أنا مش جعانه

هاجر : مفيش حاجه إسمها مش جعانه يالا قومي إغسلي وشك وصلي المغرب على ما أجيب الأكل

حور ( بخضه ) : ينهار أبيض هو المغرب أذن

هاجر : أيوة أنا جيت من ساعتين وقالولي إنك يادوب جيتي من ساعه ونمتي شوية عشان ترتاحي

فامرزييتش أصحكي

حور ( وهي بتقوم ) : طب ياللا يا هاجر عشان عندي مشوار

هاجر : رايحه فين يا حور

حور : رايحه لأمير يا هاجر ، واحشني أوي وموبايلي ضاع وماكلمتوش إمبراح خالص

هاجر : هاتفضلي تحبي أمير دا لأمتي ، دا حتى مايعرفكيش يا حور

حور ( وهي بتتهي الكلام ) : أنا بحب أمير ومستحيل أبطل أحبه ولو سمحتي بلاش كلام في الموضوع دا

هاجر : براحتك يا حور ، أنا هاقوم أجيب الأكل وإنتي قومي صلي وإجهزي عشان لو هاتخرجي تلحقي

تروحي وترجعي قبل المعاد بتاع الدار

حور : طب ياللا أنا قايمه

ونزلت هاجر وسابت حور وأول ما حور بقت لوحدها خرجت صورته من كتاب من الكتب وقالت بحسرة :

ماينفعش تعرفني عشان مستحيل تحبني ، مكتوب عليا أحبك من غير ما تعرفني .

\*\*\*\*\*

عند أمير

قام يصلي العشا وبعد ما خلص صلاة وهو بيثيل السجاده من على الأرض لفت نظره حاجه محطوطة عند

الباب ، قرب شوية وبيص ولقاها ورقة مطوية زي ما يكون حد باعتاله مخصوص

أخذ الورقة وإيديه بتترعش وبيفكر يا ترى مين اللي كاتب له الورقة دي ويا ترى الورقة دي فيها إيه ،

وبدأ يقرأ المكتوب فيها.

" أميري

هل تعلم أنني لا أجيد صياغة الكلمات سوى لك

هل تعلم أنني لا أعبر عن شعوري سوى معك

أميري الهادئ

أعشقت بكل تفاصيلك الجميل منها والمضحك ، أعشق تفاصيلك الهادئة المختلفة عن كل بني البشر

أميري

كن لي ولا تكن لغيري

أعطني قلبك

وأعدك أن أعتني به إلى نهاية حياتي

أميري

لن أطيل عليك الحديث

لكن أردت إخبارك في نهاية هذه الورقة بشيء بسيط

تأكد أنني عشقتك

وأعشقتك

وسأعشقتك

ولا يهم إن كنت ستعرفني يوماً

لأنني على أية حال سأبقى أعشقتك

فأنت الماضي والحاضر ، وأتمنى أن تكون مستقبلي يا أميري

أحبك.

### أقلب الورقة عشان في حاجة على ظهر الورقة مهمة تخصك

بينبهر أمير من اللي قرأه وبيقلب الورقة وبيلاقي مكتوب فيها

انت عايز تخرج من هنا لأن دا مش مكانك ، أنا بس اللي أقدر أخرجك ، لو في عندك رغبة إنك تخرج ،

سيب لي ورقة في نفس المكان اللي أخذت منه الورقة دي .

فضل أمير يقرأ الورقة ويكرر المكتوب بصوت عالي وهو بيفكر ، يا ترى مين من مصلحته يخرجني ،

مين هاخرجني وهو مش خايف من مهدي الخيال ، يا ترى ممكن أرجع أشوف الدنيا تاني فعلاً ؟

ومسك القلم وقطع ورقة من النوت وكتب فيها بكل حماس : أنا فعلا محتاج أخرج ، نفسي أشوف الدنيا تاني  
ونفسي أشوفك يا حلوتي .

وطبق الورقة وسابها في نفس المكان اللي كانت فيه الورقة الأولى .

## الفصل الرابع

### عند مهدي وملك

ملك ( بصدمة ) : حور مين اللي أختي وإزاي أختي ، بابا إنت أكيد ماتقصدش حور صحبتي ، إنت عارف حور قاعده فيين

مهدي : لا هي يا ملك ، هي حور مهدي الخيال

ملك : طب إزاي وليه سايبها في دار أيتام ، ليه محسسها إن مالهاش أهل ، ليه يا بابا حرمتها من اللمة وسطينا ، ليه يا بابا ليه ؟؟؟

مهدي : هاتعرفي بعدين مع الوقت بس دي حاجه أنا ماقدرتش أتقبلها لا أنا ولا أمك ، ووقتها إحنا الإنتين أخذنا خطوة وكنا فاكرين إننا كدا كفرنا عن ذنبا ، لكن أمك ماتت وسابنتي عايش بذنب مبعرفش أنام منه

ملك : هو اللي يرموا بنتهم بالشكل دا يبقى عندهم إحساس اصلاً ، دي الحيوانات بتحافظ على عيالها ومابترميهمش ، يؤسفني أقولك إنك نزلت من نظري أوي

مهدي : والله يابنتي ما كنت أعرف إن كل دا هيجصل ، أرجوكي يا ملك خلي بالك منها أرجوكي لما أموت قولي لها تسامحني

ملك : هو إنت هاتسيبها زي ما هي كدا لحد ما تموت كمان ، إنت إزاي كدا فهمني

مهدي : مش بإيدي يا بنتي والله ، اللي أقدر عليه إنني بابعت للدار فلوس ليها كل شهر

ملك ( بقرف ) : كتر خيرك يا مهدي بيه ، عداك العيب ، بس إسمع بقى ، يا حور تعرف الحقيقة وتيجي تعيش معانا ، يا إما مش هاتشوف وشي تاني ، وتتسى ملك زي ما نسيت حور .

وسابته وخرجت بسرعة وهي بتعيط جامد وبتقول : حتى إنت يا بابا طلعت بتكذب

\*\*\*\*\*

## عند أمير

كل شوية يبص عشان يشوف حد أخذ الورقة اللي هو كتبها ولا لأ لكن بيلقي الورقة لسة محطوبة زي ما هي بيستغرب جداً ويحاول مايفكرش وببسرحد في حياته من حوالي 12 سنة

## فلاش باك

أمير شاب عنده 18 سنة ، المسئوليات كبرته بدري أوي أبوه ومراته سافروا وسابوله أخته اللي عندها 6 سنين بإعاقة صعبه جداً ، وكان دايماً بيحاول يثبت لنفسه إنه قد المسئولية دي

أمير ( بدموع ) : بلاش تسافروا يا بابا أرجوك ، مين هياخد باله من ملك

مهدي ( بقوة ) : إنت راجل وهاتخلي بالك منها

أمير : أرجوك يا بابا أنا مابعرفش دايماً أتصرف صح ، طب خدني أنا وهي معاكم

مهدي ( وهو بينهي الكلام ) : أمير أنا قلت أنا وأمك هانسافر وإننت هاتأخذ بالك من أختك

أمير ( بحدة ) : ماتقولش أمني بس ، دي مرات حضرتك وبس ، ومحدث في الدنيا دي كلها ياخذ مكان ماما الله يرحمها ، ثم هي وإحنا مش فارقين معاها وهاتسينا وتسافر ، طب إنت هايهون عليك تسبب ملك إزاي باللي هي فيه دا ، إنت قلبك إيه ...

وقبل ما أمير ينطق كلمة كمان ، إتفاجئ ب قلم نزل على وشه وكان القلم دا مش بدايه كرهه لباباه بس لا دا كان بداية كل حاجه تقريباً .

فاق أمير من التفكير وكان حاسس أنه بيرجع يحس بالقلم على وشه من تاني ، كأنه لسة حالاً ، وحاول أمير مايفكرش في حاجه ومسك المصحف كعادته وقعد يقرا فيه ويعيط لحد ما جات عنيه على آية " قَالَ إِنَّمَا أَشْكُو بَثِّي وَخُزْنِي إِلَى اللَّهِ وَأَعْلَمُ مِنَ اللَّهِ مَا لَا تَعْلَمُونَ "

وفضل يقرا الآية دي بصوت عالي لحد ما بدأ صوته يهدا وأنفاسه تنتظم وعنيه راحت في النوم .

\*\*\*\*\*



## عند حور

بعد ما سابت الدار ونزلت عشان تروح لأمير فكرت في طريقة يخرج بيها من المستشفى خصوصاً إنها متأكده إنه مش مريض ولا محتاج يكون في المصححة ، سابت له الورقة وفضلت مستتياه ينام أو يبعد عن الباب عشان مايشوفهاش ولما إتأكدت أنه نام ، أخذت الورقة وإتأكدت إن أمير فعلاً مش هنا بإرادته ، وقررت تروح الدار وترجع له الصبح وفي نيتها إنها هاتساعده بكل قوتها يخرج من المكان دا للأبد .

\*\*\*\*\*

## في أوضة ملك

ملك بتعيط جداً ومش قادرة تفهم إزاي باباها عمل كدا في أختها وليه حور بذات ، يعني ليه معملش كدا معاها هي كمان ، وتعبت من التفكير وقررت تكلم حور

ملك ( وبتحاول تكون طبيعية ) : حور هانم ، كنتي مختفية فين يا زفته إنتي ، مش هاتبطني الحركات دي

حور : يا لوكا بجد كنت تعبانه شوية ، وحشتيني خالص

ملك : إنتي كمان ، ها هاتنزلي الكلية بكرة

حور : لا بكرة أنا مدية لنفسني أجازة

ملك : طب عايزين نعمل المشروع بقي وإنتي رافضه المستشفى ، إيه الحل

حور: المستشفى دي أنا ليا ذكريات سيئة جداً جداً معاها يا ملك ومش هاقدر أدخلها

ملك : خلاص حبيبتي اللي يريحك هانشوف مكان تاني بإذن الله ، إتظمني

حور : ربنا ما يحرمني منك يا كوكو ، هاسيبك أنا عشان ورااايا غسيل

ملك ( بحسرة ) : طيب حبيبتي ربنا معاكي

وقفلت معاها المكالمة وماقدرتش تسيطر على دموعها ولا تمنعها من النزول ، وفضلت تعيط لحد ما نامت مكانها.

\*\*\*\*\*

## عند أمير

أمير بيصحا من النوم وأول حاجه بيفكر فيها هي الورقة ، وبببص عليها ومش بيلاقها بس بيلاقها حاجه تانية محطوطة تحت الباب بتلمع ، بيقرّب من الباب وبيلاقه مفتاح وجنبه ورقة مكتوب فيها :

عذراً أميري سأطيل عليك قليلاً ، بدايةً صباح الخير يا أميري ، ثم أما بعد ، فهذه المرة الأولى التي أكتب لك كثيرا هكذا ولكن معي عذري فقد رأيتك في أحلامي في ليلتي الماضية

كنت أتحدث معك ، وألمس ملامحك ثم بعد ذلك أصفها بدقة ، لقد كنت معي حقاً لم يكن حلماً يا أميري بل كان واقعا ، كنت أحملك على قدمي وأداعب وجنتيك كالأطفال ، والغريب أنك لم تكن هادئاً ولا صامتاً ، بل كنت تحادثني وتتفاعل معي ، عذرا أميري بل كنت أنا من أتفاعل معك ، كنت عفويًا حد الجنون ، وكنت مشاكساً تقول لي أنني لا أستطيع أن أصفك بدقة ، كنت تبتسم لي وتهدهديني وكأنني لست حبيبتيك فقط بل ابنتك أيضا ، باختصار ، كنت اشعر ولأول مرة منذ زمن بعيد بالسعادة .

## وبرضو زي المرة اللي فاتت إقلب الورقة

ببببسم أمير غصب عنه وببقلب الورقة وببيلاقها مكتوب

دا مفتاح أوضتك يا أميري بس ماتخرجش غير لما أبعثك رساله على موبايلك وهافهمك فيها كل اللي لازم تعمله عشان تقدر تخرج من هنا من غير ما حد يمنعك .

بيقرا أمير الورقة أكثر من مرة وببيلفت نظره إن اللي غيرت له النوت هي اللي هاتخرجها ، معقول اللي هاتخرجني من هنا هي صاحبة النوت ، طب جابت المفتاح منين ، وجابت رقمي منين ، إيه الشفرة الصعبه دي

بببمسك النوت وببببدأ يقلب الصفحات وبببص على السطر الأخير من كل صفحة ، نفس الخط اللي كتب الورقة هو نفس الخط اللي في النوت

طب إنتي عايزة تخرجيني ليه ، وليه مش عايزاني أشوفك وبتقولي لي اللي عايزاه في رسايل ومش بتيجي ، ويا ترى هاعرف اخرج ولا دا كمين من دكتور سيف ، طب هو مهدي بيه هأبسيبيني اخرج كدا عادي ، ربنا يسترها بقي.



وبتبدأ حور تسمع لكل بنت منهم الجزء المقرر عليها وبعد ما بيخلصوا تسميع كلهم بتسالها بنت من البنات:  
ميس حور هو أنا ممكن أمشي ؟

**حور :** حبيتي لسه هناخد تجويد ، مش هانتأخر

وبتبدأ حور فعلاً تشرح لهم التجويد وبيفهموه وبيمشوا بقلوب صافية مش عايزة من الدنيا غير رضا اللي خلقها

وبعد ما الكل بيمشى بتستنا بنت واحده في المكان **وحور** بتقعد جنبها **وبتسألها:** ها يا شروق ، في حاجة واقفه معاكي عايزة تسألني عليها ؟

**شروق ( بخجل ) :** لا أنا عايزة اسأل عن حاجة تانية

**حور ( بتشجيع ) :** إسألني عن اللي إنتي عايزاه طبعاً ، في إيه إنتي مكسوفة ولا إيه

**شروق :** بصراحه أيوة مكسوفة جداً ، بس هسأل حضرتك

**حور :** وأنا كلي آذان صاغية ، ها في إيه بقي ؟؟؟

**شروق :** هو ليه حضرتك مابترفعيش النقاب أثناء الحلقة مع إن كلنا بنات

\*\*\*\*\*

**في شركة الخيال للاستيراد والتصدير**

بيتصل مهدي على رقم وبيستنا الرد

**مهدي :** أنا حكيت لـ ملك كل حاجة

**الشخص :** إنت غبي يا مهدي ليه عملت كدا ، ربنا سترك تقوم تفضح نفسك إنت وقدام مين ، قدام بنتك

**مهدي :** غصب عني مقدرتش أخبي أكثر من كدا

**الشخص :** طيب أنا هاجي لك ونكمل كلامنا عندك ، مش إنت في المكتب

**مهدي :** أيوة

**الشخص :** طب أنا جاي لك حالاً ، بيني وبينك ربع ساعه

**مهدي :** مستنيك يا أكرم .

\*\*\*\*\*

**عند أمير**

بيفضل كل شوية يفتح موبايله ويقرا الرساله ويدعي لها إنها تكون بخير ، وعمال يعد الساعات ومستني بكرة بفرار الصبر ، عشان هايخرج من المكان دا وكمان هايشوف مجهولته الغريبة .

بيبدأ يمस्क النوت عشان يكتب فيه وبيكتب : حياتي بائسة لدرجه مش هاتقدري لا إنتي ولا أي بشر يتحملها ، أنا شوفت كتير أوي يا مجهولتي ، تقيل عليا الإسم دا ، أسميكي إيه بس وأنا مش عارف لك حتى إسمك ، المهم إنك مستحيل تقدري تحبي حد عنده كل البؤس دا في حياته .

وبيقفل النوت عشان ينام لكن الماضي بيرفض إن أمير ينام في سلام من غير ما يقتحم عقله ، وبيبدأ يفنكر

**فلاش باك**

أمير بيدخل لملك أوضتها وبيلاقيها نائمة فابيشيلها من سريرها ويدخلها أوضته ، ويضمها ،

بتبدأ تصح ملك وتمسح وشها بإيديها وتقول : صباح الخير

**أمير :** صباح الخير بالليل يا كوكو ، كلمي نوم يا قلبي ، أنا آسف صحيتك ، أنا جبنتك تنامي جنبني عشان

ماتخافيش وإنتي لوحدك

**ملك ( بحزن ) :** هو بابا خلاص سافر ومش هانشوفه تاني يا أمير

**أمير ( بيضحك على برائتها ) :** لا يا حبيبي ماتخافيش بابا هايرجع تاني إن شاء الله بس هو سافر يعمل

عملية لماما وهايرجع

**ملك :** إنت بتكذب عليا ليه ، أنا مش صغيره يا أمير أنا كبرت وبقيت في سنة أولى

حضانها أمير وقال لها : طب هو إنتي مش مبسوطة يعني إنك هاتفضلي مع أمير

**ملك :** لا طبعاً مبسوطة بس عايزة بابا كمان

أمير ( ويحاول يغير الموضوع ) : كنت جاييلك حاجه حلوة هاديهاالك الصبح ، إيه رأيك أديهاالك دلوقتي

ملك ( بفرحة ) : بجد يا أمير فين أنا عاوزاها

أمير ( ويديها عروسة باربي وبيقولها ) : إتفضلي يا ستي ، باربي زي ما كنتي طالبة بالظبط

ملك ( بفرحة ) : الله أنا مبسوفة شكراً يا أمير ، وباسته على خده وقعدت على السرير تلعب مع باربي

وتقول لها: أنا بحبك أوي يا باربي ، أنا شايفاكى بس مش عارفة أشوفك حلو ، بابا قالي إنه هايعمل لي عملية

لما أكبر عشان أشوف كويس يا باربي ، وحضنتها وقالت لها : ياللا تصبحي على خير يا عروستي .

وكل دا وأمير بيتفرج عليها من بعيد وهو نفسه يساعد ملك إنها ترجع تشوف كويس من تاني .

بيفوق أمير من شروده على صوت رسالة بيفتحها بلهفة وبيلاقي مكتوب فيها : أنا إشتريت موبايل النهاردا

من شوية ، إتضمن أنا هاجي لك بكرة من بدري وهاقول لك تعمل إيه ، بس ماتعملش التليفون سايلنت عشان لما

أرن لك لو إنت نايم تصحا على الصوت ، تصبح على جنة يا أميري .

بيقل أمير الرساله وبيقول لنفسه : خلتيني أتعلق بيكي وأنا ماعرفكيش ، يارب لو هاتوجعيني ربنا يبعدك

عني ، أنا مش حمل وجع جديد .

## الفصل الخامس

مهدي قاعد في مكتبه بيتفاجئ بالباب بيتفتح وأكرم بيقول له بهزار: إنت سرحان كدا ليه يا مهدي ، بتحب ولا إيه

**مهدي** : أحب إيه بس إنت كمان ، إقعد خرينا نتكلم

**أكرم** ( بجدية ) : ليه عملت كدا يا مهدي

**مهدي** ( بحنان ) : والله لما عرفت إن حور كانت مختفية من الدار قلبي وجعني وخفت عليها ، فقلت لـ ملك عشان تخلي بالها منها

**أكرم** : ودلوقتي ملك رأيها إيه ولا عملت إيه لما انت حكيت لها

**مهدي** : ملك إيتصدمت جداً وقالت يا إما حور تعرف الحقيقة وتيجي تعيش معانا يا مش هاشوف وشها ثاني ، إنت متخيل إني ممكن أخسر بناتي الإنتين

**أكرم** : وممكن تكسبهم الإنتين يا مهدي ، اللي كان بيمينك ترجع حور زمان خلاص خلص ، واللي رفضت وجودها ماتت

**مهدي** ( بحيرة ) : وتفتكر بسهولة كده هتوافق ترجع معايا ، أو هاتسامحني على كل السنين اللي سبتها تقضيها في دار أيتام وحارمها من وجودنا جنبها فيها دي ، تفتكر ممكن في يوم أسمع كلمة بابا منها

**أكرم** ( بحزن على صاحب عمره ) : الأيام هاتتسيها كل حاجه ، ومعاملتك الحلوة معاها هاتخليها تسامحك أكيد

**مهدي** : بس لو حصل وفي يوم من الأيام عرفوا السر القديم أنا خايف ماشوفهمش ثاني فعلاً

**أكرم** : سيبها على الله يا صاحبي

**مهدي** : ربنا يستر

\*\*\*\*\*

## يوم جديد في مستشفى العباسية للأمراض النفسية

بتوصل حور المستشفى من بدري وبتدور بعينها على سيف لحد ما تلاقيه

حور وهي راичه عليه : دكتور سيف أخبارك إيه

سيف ( بابتسامة ) : حور

حور : أيوة أنا ، عرفتني إزاي بالنقاب

سيف : من عيونك

حور ( بلخبطة ) : محتاجه منك مساعدة

سيف ( بترحيب ) : طبعاً طبعاً إنتي تؤولي

حور ( ومش عارفة تبدأ منين لكن بتستجمع شجاعتها وبتقوله بلهجة سريعة وكلام ملخبط ) : أمير أنا عايزة

أخرجه من هنا أمير مش تعبان وأبوه جايبه هنا عشان سبب أنا ما عرفوش ، عايزين نهربه قبل ما يعمل في نفسه  
حاجه

سيف ( باستغراب ) : إنتي تعرفي أمير

حور : مش وقته آه أعرفه .. أمير يبقى ..

سيف : يبقى إيه

حور : مش وقته يا سيف ، هاتساعدني نخرجه ولا لأ

سيف : إستتي إستتي إنتي قولتي سيف عادي كدا من غير دكتور

حور ( بملل ) : يوووو إنت بتفكر في إيه إنت كمان

سيف ( برومانسية ) : ما عرفش إن الإسمي حلو كدا

حور ( وهي بتستعد تمشى ) : عن إنك يا دكتور ، أنا كنت فاكراك هاتساعدني ، لكن واضح إن دا مش صح

سيف : هساعدك يا حور ، بس خلينا ندخل المكتب نتكلم



حور : نتكلم في إيه

سيف : خلينا ندخل طيب عشان نقدر نتناقش

حور : مفيش وقت إحنا عايزين نخرجه قبل ما المستشفى تتملي

سيف : إنتي متأكدة إنه مش مريض نفسي فعلا ، أنا كنت الدكتور المتابع لحالته لكن عمره ما وافق يتكلم

معايا ، لكن فعلاً أنا بحس إن عقله سليم وماعنددهوش مشكلة عقلية تخليه يكون هنا

حور : إتظن يا دكتور خروجه للمجتمع مش هيؤثر عليه تأثير سلبي ، إنت جربت الموضوع دا مع اللي

أصعب من حاله أمير وشوفت النتيجة بنفسك ، ولا إيه ؟؟؟

سيف ( براحة ) : طبعاً طبعاً ، عندك حق

حور: طيب إيه هنخرجه منين وإزاي

سيف : بصى يا ستي

\*\*\*\*\*

عند أمير

أمير بيصحا من النوم ومبسوط جدا بيحاول يقنع نفسه إنه مبسوط لأنه هيخرج من المستشفى لكن في الحقيقة هو مبسوط أكثر إنه هايشوف مجهولته اللي بتبعت له وبتهتم بيه وكمان هتخرجه ، لكن خرجه من الحلم الجميل دا صوت عقله وهو بيقول له : وهاتروح فين لما تخرج من المستشفى يا أمير

نفسه : أي مكان هايكون أهون من هنا ، أقدر أخرج بس وبعدها كل حاجه هانتحل إن شاء الله

ومسك المصحف وبدأ يقرأ فيه لحد ما إنتبه على صوت رساله ، فتحها بكل حماس ولهفة

وكان مكتوب فيها : صباح الخير يا أميري ، أنا خلاص في المستشفى ربع ساعه بالظبط وهاقولك تعمل إيه ، قوم إجهز ولو محتاج حاجه تاخذها معاك جهزها وإستنا مني رسالة .

\*\*\*\*\*

## عند ملك

بتصحا ملك من النوم وبتلبس بسرعه عشان تنزل الكلية وبتلاقي مهدي مستنيها في الصالة وبيناديها : ملك

إستي

ملك : خير يا بابا

مهدي : أول مرة تنزلي من غير ما تقولي لي صباح الخير وتشوفيني لو محتاج حاجة

ملك : أنا قلت لحضرتك اللي عندي إمبارح ، يا حور ترجع يا تنسى ملك هي كمان

مهدي : حاضر يا ملك ، ربنا يقدرني وأقدر على الخطوة دي

ملك : ولحد ما تقدر عليها إعتبرني مش موجودة يا بابا ، عن إذن حضرتك

\*\*\*\*\*

## في دار الأمل للأيتام

بيدخل مهدي وبيلاقي ترحيب من كل المسؤولين ، بيتجه لمكتب مديرة الدار وبيطلب يقابلها ويتسمله

السكرتيرة بالدخول

إلهام ( بترحيب ) : أهلاً أهلاً مهدي بيه الخيال بنفسه هنا

مهدي : من ذوق حضرتك يا أستاذة ، أنا جاي النهاردا عشان أرجع بنتي

إلهام ( بصدمة ) : حضرتك بتقول إيه ، وهنقول لها دا إزاي يا فندم

مهدي : أنا مش عارف ، لكن حور لازم ترجع كفاية لحد كده أوي

إلهام ( وهي بتحاول تهديه ) : طيب سييني يومين أمهد لها يا فندم ونخلص أوراق خروجها من الدار وهاكلم

حضرتك

مهدي : ياريت ماتتأخريش أرجوكي

إلهام : إن شاء الله

\*\*\*\*\*

### عند أمير

بعد ما بيقرأ الرسالة بيبدأ يجهز حاجاته البسيطة جداً اللي هايتاجها معاه ، واللي هي عبارته عن مصحفه وشاحن موبايله والنوت والقلم ، وملف محدش يعرف عنه أي حاجة .

\*\*\*\*\*

### عند أوضة أمير

بتقف حور وتتبع أمير رساله وتتقول له : عندك نضارة سودة

بيفتح أمير الرسالة ويبعت لها رسالة زيها : لأ

بتنزل حور من المستشفى وتتجيب لأمر نضارة سودة وماسك وجاكيته شتوي ثقيل ، ويترجع تاني بسرعه وتتبع له رساله : هاسيب لك قدام الباب شنطة إفتح الباب ودخلها وإستنا مني رساله

بيستغرب أمير جدا ويحاول يفهم لكن بيتقول لنفسه : أصبر وهاتفهم كل حاجه

بيفتح الباب فعلاً وبيلاقي شنطة بياخذها لجوة وبيقفل الباب بسرعه عشان محدش يشوفه ولا حد يلاحظ إن مفتاح الأوضة معاه

وطبعاً أول ما يقفل الباب بيلقي رسالة من حور مكتوب فيها : إلبس النضارة والكمامة والجاكيته فيه ظنط إلبسه وكدا هتبقى مش باين ليك ملامح لأي حد ، وعلى ما تلبس هاكون أمنت لك المكان وإتأكدت من سيف إن محدش من الممرضات المتابعين ليك هايمر على أوضتك في الوقت اللي هتخرج فيه ، ماتخرجش غير لما أبعت لك تخرج ، ولما تخرج سيب المفتاح على السرير ماتجيبهوش معاك

قفل أمير الموبايل وبينفذ كلامها وهو مستغرب من كمية الأكشن دي لكن مفيش حل إنه يخرج غير كدا ، خصوصاً إن لو حد بلغ مهدي إنه عايز يخرج مستحيل يوافق ، ويوافق إزاي وهو اللي جابه هنا بدون أي وجه حق .

\*\*\*\*\*

## عند سيف

بيبدأ ينادي الممرضة اللي المفروض تمر على أمير وبيطلب منها تساعد بنات كانوا نازلين تدريب في إنها توصلهم للحالات اللي هابتدربوا عليها ، وطبعاً هو بيعمل دا عشان يخليها تتلهي وماتمرش على أمير دلوقتي وبتنفذ الممرضة كلامه بدون أي تفكير وفي الوقت دا بيكلم سيف حور وبيقولها : خليه يخرج دلوقتي

\*\*\*\*\*

## في كلية الآداب جامعة القاهرة

رقية وملك قاعدين في الكافيتيريا ورقية بتحاول تخلي ملك تكون هادية وملك بتعيط بحرقة وبتقولها : حور أختي يا رقية وبابا سايبها كل دا عايشة في القرف اللي هي فيه دا ، أنا قلبي واجعني أوي هاقولها إزاي ، هي هاتحس بآيه ، تفكري هاتسامحني ، بس والله أنا ماكنتش أعرف رقية ( وبتحاول تهديها ) : إهدي يا ملك كل حاجه هانتحل وحور عاقلة ولا يمكن تشيلك ذنب إنتي مالكيش يد فيه

ملك ( وبتحاول تمسح دموعها ) : أنا خايفة عليها أوي

رقية : إتطمني يا حبيبتى كله خير إن شاء الله ، بس قولني لي هو أمير أخوكي يعرف إن حور تبقى أختكم

ملك ( بتفكير ) : معرفش ، أنا هاروح له وهأسأله ، تفكري كان عارف وسابها

رقية : مش عارفة ، روعي واسألنيه وإفهمي منه كل حاجه ، ولو عنده حاجه تريحك أكيد هيقولها لك

ملك : عندك حق

\*\*\*\*\*

## في المستشفى

بتبعت حور رسالة لأمير وبتقوله : ياللا يا أميري أخرج

بيفتح أمير الرساله وبيقوم من مكانه لكن بتجيله رسالة تانية منها مكتوب فيها : أي حد يسألك إنت مين تقول إنك نازل عندك تدريب ، ومهما حصل إوعا ثقتك في نفسك تتهز ، عشان محدش يشك فيك وتقدر تخرج من هنا من غير مشاكل

بيقوم أمير من مكانه وبيفتح باب الأوضة بإيد بتترعش وبيخرج من الأوضة فعلاً وبيقفلها وراه ، بيستغفر وبيدعي كتير في سره إن ربنا يخرجه من المستشفى على خير من غير ما حد يشك فيه

لكن وهو نازل على السلم خبطت فيه بنت من غير ما تاخذ بالها وقالتله باستعجال : أنا اسفة

ولما سمع صوتها كل حواسه إتجمدت وحاول يستعيد ثقته في نفسه وسابها ومشى بسرعة

وهو بيقول في سره : استرها يا رب.

---

## الفصل السادس

حور بتقف مكانها وبتبص على أمير من بعيد وهو خارج ومش قادرة تروحله وبتفضل تبص عليه لحد ما يختفي من قدام عنيتها ، وفي الوقت دا بتقعد على الأرض بحزن وبتقول لنفسها : ياه يا أميري ماتتصورش أنا بحبك قد إيه ومبسوطة عشانك إزاي ، بس خايفة أوي ، خايغة ما اعرفش أوصل لمكانك تاني ، أنا كان نفسي أكون زي كل البنات وأول ما تخرج تلاقيني مستنيك ، لكن للأسف مش كل اللي بنتمناه بيحصل .

إستغفرت ربها وقالت الحمد لله على كل حاجه وقامت من مكانها ونزلت لمكتب سيف ، خبطت عليه ودخلت

حور: أمير خلاص خرج ، مش عارفه أشكرك إزاي بجد يا دكتور

سيف ( بحنان ) : ولا تشكريني ولا حاجه ، إقعدي يا حور

حور ( بتحاول تتهرب من عنيه وبصاته الغريبة بالنسبه لها ) : أنا هامشى عشان ما اتأخرش

سيف : إقعدي يا حور ماتخافيش

قعدت حور ( وهي مستغرياه وقالت له ) : في حاجه ولا إيه ، حد لاحظ حاجه

سيف : لا لكن المفروض إن أنا أول حد هايلاحظ لإني المسئول عن حالته

حور : طب وهاتعمل إيه

سيف ( بحيرة ) : هابلغ المستشفى إني دخلت عشان أتابعه مالمقيتهوش والمفتاح لقيناه على السرير ، هو

إنتي جييتي مفتاح أوضته منين يا حور

حور : دا إنت الوحيد اللي عارف المفتاح دا معايا إزاي

سيف ( باستغراب ) : هو كان لسة معاكي

حور : سبحان الله إتخلصت من كل حاجة إلا هو ، وأهو جاله وقته

سيف : بتحبيه ؟؟؟

حور : جداً ، فوق ما أي بشر يتصور

سيف : ليه ؟

حور : مفيش مع الحب ليه ، دي حاجة بتاعة ربنا

سيف : عندك حق ، بس خلي بالك على نفسك يا حور

حور ( وهي بتقوم ) : إن شاء الله ، عن اذنك

بتخرج حور من مكتب سيف وبيقول سيف لنفسه : الحمد لله إني محببتهاش أوي

\*\*\*\*\*

في أوضة أمير بالمستشفى

بتخبط ملك على أمير وبتدخل زي كل مرة لكن بتتصدم لما مابتلاقيهوش في أوضته وبتلاقي المفتاح على السرير وبتبدأ ترزعق : إيه اللي بيحصل هنا فين أمير ، وبتنزل على مكتب سيف وهي بتجري وسيف بيستغرب شكلها لأنه متعود إن ملك دائماً بتحاول تلفته وبيقول لها : في إيه يا أنسة خير

ملك : خير إيه وزفت إيه، أمير مش في أوضته ، تقدر تفهمني هو فين ؟؟؟

سيف ( وهو بيحاول بيان مستغرب ) : معقول طب هيفتح الباب إزاي

ملك ( بعصبية ) : إنت بتسألني ، أنا هاكلم بابا حالياً ، والله لاوديكم كلكم في داهية

\*\*\*\*\*

عند أمير

أمير بعد ما بيخرج من المستشفى بيحاول يفكر هيروح فين ، هو مالوش مكان غير بيت مهدي الخيال ، وأكيد مش هايرجعله تاني ، المصحة أهون من بيت مهدي .

ركب أمير المترو وقرر يروح لصاحبه الوحيد أدهم وبيات عنده النهاردا ، وبكرة ينزل يدور على شغل

وصل أمير للمكان اللي هو رايح له وخبط على الباب وهو مكسوف جداً





شادن : طب أدخلي ياللا البنات مستنيين من بدري

بتدخل حور للبنات وبتسمع لكل واحدة منهم الجزء المقرر عليها وبتبدأ تشرح لهم تفسير وفي اليوم دا كان مقرر شرح تفسير أول صفحة من سورة القصص ، بتخلص حور الحلقة وبتلاقي شروق مستنياها برضو وبتقولها : عايزة أتكلم معاكي يا ميس

حور : إقеди يا شروق

شروق : ليه لما سألتك الحلقة اللي فاتت عن سبب لبسك النقاب طول الوقت عيطتي ورفضتي تجاوبيني

حور ( بدموع ) : لأن دي حاجه تخصني لوحدي ومافتكرش إنها هاتفرق في حاجه سواء جاوبت عليها أو لأ

شروق ( بحزن على حور ) : أنا دكتورة شروق القاضي دكتورة الأمراض النفسية والعصبية وخريجة من 5 سنين ، لو إحتاجتي تتكلمي أنا هاسمعك ، بس قبل ما أمشي عايزة أقولك حاجة مهمة ، النقاب لو بيداري وشك فشخصيتك جميلة وكلنا بنحبها ، والمظهر ولا حاجه قصاد الروح الحلوة وخصوصاً لما تبقى حلوة زيك ، وطلعت كرت من شنطتها وحطته في إيد حور ، حضنتها جداً وقالت لها عن إذتك يا ميس

خرجت شروق وفضلت حور قاعده مكانها بتفكر : هو أنا ممكن فعلاً أكون جميلة ؟؟؟

\*\*\*\*\*

## في المستشفى

بيدخل مهدي الخيال لمدير المستشفى وبيزعق بكل غضب : يعني إيه هرب ، هو المسئولين عنه عيال ،

أنا مش هاسكت على التهريج اللي بيحصل دا

المدير حاول يهديه كثير وطمنه إنهم هايلاقوه في أقرب وقت ممكن

لكن مهدي قال لهم : إنه هيدور عليه بنفسه وهايلاقيه ويوديه مصحة اللي فيها يقدرنا يحافظوا عليه .

وخرج مهدي من المستشفى هو وملك وقال لها من غير ما يبصلها : أنا روحت الدار اللي فيها حور ومديره

الدار هاتعرفها وهاتنظبط أوراق خروجها وبعد يومين هاترد عليا ...

ملك : تمام جداً يا بابا

مهدي : لما أختك ترجع حاولي على قد ما تقدري تحتويها ، أكيد اللي هاتعرفه مش هايكون سهل عليها

ملك : من غير ما تقول ، حاضر

\*\*\*\*\*

عند أمير

بيتغدى مع أدهم ومامته وبينام بسرعة جداً من كتر التعب وجواه مقرر ينزل يدور بكرة على أي شغل عشان أكيد مش هاینفع یفضل کثیر عند أدهم .

\*\*\*\*\*

في دار الأمل للأيتام

بتوصل حور الدار ولسة هاتروح على أوضتها لكن بتلاقي ميس بسمه بنقولها : إن استاذة إلهام مديرة الدار عايزها في مكتبها .

حور ( بضحك ) : عايزاني أنا ليه ، جايبالي عريس

بسمه : تقريباً كدا

حور ( وهي بتشاور لها باي باي ) : طب هاشوفها

بتستأذن حور انها تدخل وإلهام بتسمحها فبتدخل حور ( وبتتكم بأدب ) : أستاذة إلهام ، ميس بسمه قالت لي إن حضرتك عايزاني

إلهام ( بحنان ) : إقعدني يا حور

بتقعد حور وهي مستغربة من طريقة إلهام الغريبة عليها ، لأن إلهام معروف عنها إنها حادة جداً

حور : خير ، حضرتك قلقتيني

إلهام : إحنا وصلنا لأهلك يا حور وأبوكي عايز يرجعك

حور ( بصدمة ) : أهلي أنا ، طب وصلتوا لهم إزاي ، ومين بابا ، طب وماما إنتي شوقتيها

وبتبدأ حور ( تعيط ) : يعني أنا ليا أهل ، طب ليه سابوني

إلهام ( وحرر صعبانة عليها ) : أبوكي هاىككي لك كل حاجه بس جهزي نفسك ، أبوكي هيجي بكرة  
عشان ياخذك

حور : حاضر

بتطلع حور من مكتب إلهام وهي مش عارفة هي مبسوطه ولا زعلانة ، بتفكر في اللي جاي بكل الخوف  
اللي في الدنيا ، وبتطلع أوضتها وبتحضن هاجر وبتقول لها : أنا لقيت أهلي يا هاجر ، وآخر يوم ليا معاكم  
النهاردا ، بابا هايجي بكرة

حضنتها هاجر وقالت لها: والله يا حور تستاهلي إنك تلاقهم ، ربنا يفرح قلبك ويا بختهم إنك بنتهم .

\*\*\*\*\*

في مكتب مهدي الخيال

مهدي ( بيتكلم في التليفون بعصبية وبيقول ) : أمير هرب من المستشفى يا أكرم ، أنا خايف يقول لملك الحقيقة

أكرم : لو كان عايز يعمل كذا كان قال لها من زمان ، إنت ناسي إنها كانت بتزوره في المستشفى

مهدي : يعني تفكر أعمل إيه

أكرم : سيبه يعيش ، إنسأه يا مهدي وهو بيحب ملك ومستحيل يقول لها حاجه

مهدي : بس أنا عايز أدور عليه

أكرم : أمير عنيد ولو دورت عليه وإتحديته ممكن يعاند ويقول لملك لمجرد إنه يعانداك ، ماتدورش عليه

وسيبه يعيش حياته وكفايه أوي عليه كذا

## يوم جديد في دار الأمل

بتصحا حور من النوم وبتجهز عشان تقابل باباها اللي هي متحمسة تعرف شكله ، وبتجهز كل حاجه ممكن تحتاجها ، وبتمسك موبايلها تبعت رسالة لأمير: صباح الخير يا أميري ، أتمنى تكون مبسوط إنك خرجت من المستشفى ، النهاردا يوم فارق في حياتي ، إدعي لي .

وبتقفل موبايلها ولسه هاتمسك النوت لكن لقيت هاجر ( بتسلم عليها بحزن وبتقول لها ) : ميس بسمة بتناديكي ، تقريباً باباكي عند ميس إلهام

سلمت عليها حور ونزلت بفرحة وخوف ووصلت عند مكتب ميس إلهام ، خبطت على الباب وإيدها بتترعش جامد جداً

إلهام : أدخل

دخلت حور وكان مهدي قاعد مع إلهام فقالت حور: ميس الهام ميس بسمة قالت لى إن حضرتك طلبتيني وبصت جنبها وشافت مهدي وقالت : مهدي بيه أخبار حضرتك إيه

مهدي ( من غير ما يبصلها ) : الحمد لله

إلهام : إقعدني يا حور

قعدت حور وبدأت إلهام تتكلم وقالت لها : حور أنا قلتك إن باباكي هايجي ياخذك النهاردا ، جاهزة تشوفيه حور : أه جداً نفسي أشوفه

مهدي ( وأخيرا خرج عن سكوته ) : أنا أبوكي يا حور

حور ( بصدمة ودماغها بتلف ومش حاسه بالدنيا ) : انت !!!!

---

## الفصل السابع

أمير بيصحا من النوم وببلاقي نهلة واقفة في المطبخ ، بيدخل يصبح عليها ويقولها إنه نازل هايعمل كام مشوار وهايرجع

نهلة : ربنا يوقفك ويستر طريقك ويراضيك يابني

أمير ( ببيوس إديها ) : ربنا ما يحرمني منك يارب

وبينزل أمير وهو مقرر قبل ما يروح الشغل هايعمل كام مشوار الأول

\*\*\*\*\*

في دار الأمل

مهدي : أيوة يا حور ، أنا أبوكي ، إنتي مش فرحانة

حور ( بزعيق لأول مرة في حياتها ) : أفرح بإيه إنت عارف إنت عملت فيا إيه ، كنت سايبني ليه ، إزاي

أمي سابنتي ، إنتو إيه ، أنا العيشة هنا بالنسبالي أهون بكتير من إني أعيش معاك ،

أنا بكرهك ومش عايزة أرجع

مهدي وإلهام مستغربين جداً : حور إنتي كنتي مستعدة إنك ترجعي ، إيه اللي غير وجهة نظرك

حور : ماكنتش أعرف إني باشوف أبويا من زمان وهو بالنسبالي مهدي بيه ، ماكنتش أعرف إن أبويا عاش

حياته كلها مرتاح وسابني أتمرمط والدنيا تلطش فيا عشان أتعلم وأدخل كلية ، ماكنتش أعرف إن أبويا بيدفعني

تمن حاجه أنا مليش أي ذنب فيها ، ماكنتش أعرف إن أبويا هايكون بالبشاعه دي ، أنا مش هارجع ولا هاتحرك

من هنا غير لما أفهم ، سبتني هنا ليه

مهدي : والله غصب عني

حور ( بصريخ ) : غصب عنك يعني إيه فهمني عشان مش فاهمة ،

قولي سبب متقوليش كلام مبهم ، رد عليا ماتسكتش كدا ، إنطق وقول لي سبب يخليك تسييني

**مهدي :** حور أنا حسيت بغلطي وجاي دلوقتي عشان أرجعك ، خيلنا نفتح صفحة جديدة ونبدأ من جديد ، أرجوكي سامحيني يا بنتي

**حور :** وإيه اللي رجعت بقي إن شاء الله ، ضميرك صحي ، اللي زيك ماعدوش ضمير عشان يصحا ، أنا مش هارجع معاك

**مهدي :** أرجوكي يا حور إنسى وخيلنا نبدأ من جديد

**حور ( بقهرة ) :** والقديم أنساه ، أنساه إزاي ، أنسى إيه ولا إيه ، أنسى إني عشت طفولة اسوأ من خيالك ، ولا أنسى إني دلوقتي عندي 30 سنة وماعنديش حد قريب ليا ، أنسى إني باخبي حقيقتي عن الكل ، ماهو حقي أخبياها ، إذا كان أبويا وأممي رموني بسببها ، ولا عندك سبب تاني رد عليا ، إنتو ليه جيبتونني الدنيا لو هاتهدلونني كدا ، حسبني الله ونعم الوكيل ، قول لي يا مهدي بيه أنسى إن الشخص الوحيد اللي حبيته ماقدرتش أخليه يعرف حقيقتي ، أنسى إيه بالظبط حدد لي وأنا موافقة أنسى ، بس قول لي أنسى إيه, أنسى إن أبويا رمانني ، أنا اااا أنا اااا

وبدأ لسانها ينقل وعنيها تقفل ووقعت في الأرض وهي بتصرخ بكل صوتها : أميريبي

\*\*\*\*

**عند ملك**

**ملك** قاعده في أوضتها ومستتية حور وخايفة جداً من المواجهه معاها ، هل حور هاتقبلها ولا هاتشيلها الذنب وبتقول في نفسها : ربنا يستر

وغمضت عنيها وهي بتفتكر اللي حصل معاها وغير مجرى حياتها من 6 سنين

**فلاش باك**

**أمير** قاعد جنب ملك في مستشفى وماسك إديها وبيقولها : حمد لله على سلامتك يا حبيبتني ، دلوقتي لما تفوقي تكوني شايفة كويس ، العملية نجحت يا ملك وأكد دلوقتي هاتبقي مش محتاجة حد ، أنا مبسوط عشانك ، لكن مقهور عشان نفسي .

ملك بتفتح عنيا بصعوبة لكن بتلاقي نفسها شايقة شاب قاعد قدامها ، بتفتح عنيا وتقلها كثير عشان تتأكد  
إنها شايقة بجد وإن دا مش حلم

ملك ( بفرحة جنونية ) : أنا شايقة ، إنت أمير صح

أمير ( بفرحة عشانها ) : آه أنا يا حبيبي ، حمد لله على سلامتكم يا كوكو

ملك : الله يسلمك يا أمير ، فين بابا ؟؟

أمير : طيارته زمانها على وصول ، أول ما يوصل هايجي لك

ملك : أنا فرحانه أوي نفسي بابا يجي عشان أشوفه ، نفسي أعرف شكله ،

وكان نفسي ماما تكون عايشة عشان اعرف اشوف شكلها

أمير : إرتاحي دلوقت يا كوكو على ما معاد العلاج بتاعك يجي عشان ماتتعبيش يا روجي

ملك : حاضر يا أمير

بتغمض ملك عنيا وهي فرحانه إن عمليتها نجحت لكنها سامعة اللي حوالياها ،

بتسمع أمير بيتكلم مع حد في التليفون ويقول : مهدي بيه عرف كل حاجه ، أنا لازم أهرب

حاولت ملك تفهم ليه أمير ماقالش بابا وليه هايهرب ، ويا ترى مهدي عرف إيه يخلي أمير يهرب منه

وفعلاً أمير بيوطي عليها بيوس راسها ويودعها ويقولها : هتوحشيني أوي يا كوكو ، هتوحشيني ، وبتنزل

دمعة من عيونه على خدها لكن بتقرر ماتحسسهوش إنها حست بيه لحد ما تفهم في إيه .

بتفوق ملك من أفكارها وبتقول لنفسها : لو ماكنتش سمعتك بوداني وإنت بتقول إنك هاتهرب عمري ما كنت

هاصدق أبدا إنك سرقت بابا وقلت كمان إنه مش أبوك ، ماكنتش هاصدق لولا إنك هربت سنتين كاملين محدش

يعرف فيهم حاجة عنك ، الله يسامحك يا أمير ، أنا لسة مش عارفة أكرهك ، لكن الصورة اللي كنت راسماها لك

إتكسرت من اليوم دا ، بس مانكرش إنني خايقة عليك ،

يا ترى سبت المستشفى وروحت فين ، ربنا يسترها عليك يا أمير يارب .

\*\*\*\*\*

في دار الأمل

مهدي بينزل على الارض جنب حور وبيحاول يفوقها لكن مش بتفوق ،  
بينزل بيها تحت وبيركب العربية وبيقول للسواق : إطلع بينا على البيت بسره  
بيكلم الدكتور أدهم يسبقهم على البيت وبيقوله إن بنته تعبانة ، وأدهم بيفتكرها ملك وبيروح بسرعة جداً  
بيوصل مهدي وأدهم في نفس الوقت تقريباً ،

وبيشوف أدهم إن مهدي شايل بنت وداخل بيها وبيقوله : هادخلها وشوفي مالها بسرعة  
بيبص أدهم عليها وبيحاول يفكر هو شافها فين قبل كدا لكن مايقدرش يفكر فابيدخل جوة ورا مهدي  
وبيبدأ يكشف عليها وبيقول : متقلقش يا مهدي بيه إنهيار عصبي ، تقريباً في حاجة زعلتها ، هتاخذ المهدي دا  
وتبعد عن أي توتر وهاتبقى كويسة بإذن الله  
مهدي : ماشي يا إني شكراً ليك يا أدهم

أدهم ( باستئذان ) : دا واجبي ، هستأذن أنا ، عن إذنك

\*\*\*\*\*

عند أمير

بيدخل مركز الهدى لتحفيظ القرآن وبيقابل شادن وأول ما بتشوفه بتقف بفرحة : أمير بيه

امير : إزيك يا شادن

شادن : الحمد لله أنا بخير ، حضرتك فين بقالك فترة ، لا بتسأل على المركز ولا حتى بتاخذ الأرباح

أمير : حصلت لي ظروف وغصب عني ماقدرتش أتواصل معاكي ، سيبك من الأرباح ومن كل دا ،

التحفيظ شغال تمام

شادن ( بتطمنه ) : تمام أوي ماتقلقش يا أمير بيه وكل أرباح ال4 سنين اللي فاتوا موجودة في حساب

بإسمى في البنك كنت باحطها كل شهر لحد ما حضرتك ترجع بالسلامة

أمير ( بصدمة ) : أرباح ال4 سنين موجودين ، إنتي بتتكلمي بجد !!



شادن : أيوة طبعا أنا كنت بادفع رواتب الموظفين وبادفع الضرائب وباقي فلوس حضرتك متشاله تقدر تيجي معايا ونسحبهم بكرة وحضرتك تتصرف فيهم زي ما أنت حاب

أمير ( بشكر ) : مش عارف أقولك إيه يا شادن ، ربنا يراضيك يارب ،  
طب قوليلي بقى ، إيه الجديد ؟؟ في طبعا موظفين مشيوا وموظفين جداد إشتغلوا

شادن : طبعا يا أمير بيه ، دول 4 سنين برضو ، مش شوية

أمير ( وهو بيقوم من مكانه ) : طب قولني لهم إن في إجتماع بعد بكرة الساعة 3 ولازم الكل يكون موجود ،  
محتاج أشوفهم وأتعرف عليهم ، محتاج أباشر المركز من تاني

شادن ( باحترام ) : تحت أمر حضرتك يا أمير بيه

أمير : هامشي أنا بقى عشان عندي مشاوير كتير جداً محتاجة تتعمل

شادن : إتفضل .

\*\*\*\*\*

### في بيت مهدي الخيال

بتنام حور لحد تاني يوم وبتفتح عنيا الصبح بتلاقي نفسها جنب ملك ،  
بتتصدم وبتصحيحها من النوم وهي مش فاهمة حاجه وبتقول لها : ملك ملك يا زفته قومي

ملك ( بتفتح عنيا وبتقوم تقعد على السرير وبتقول بخضة ) : حور إنتي كويسة يا حبيبتي

حور : أيوة كويسة بس مش فاهمة إيه اللي جابني عندك

ملك ( بتهته ) : هو هو إنتي زعلانة إنك شوفتيني ولا إيه

حور ( بتبص في عنيا وبتقول لها ) : ملك أنا هنا باعمل إيه ؟؟

ملك : إنتي هنا في بيتك يا حور ، مهدي الخيال يبقى بابا زي ما هو باباكي

حور ( بصدمة وعنيا هتخرج من مكانها ) : إستني إنتي تقصدي إنك .....

ملك : أه إنتي ماطلعتيش صحبتي وبس إنتي أختي كمان

حور بتحضنها وبتدخل في عياط هيسيري وملك بتحاول تهديها ومش فاهمة إيه اللي قاهرها كدا

ملك : إهدي يا حور في إيه

حور ( بلخبطة ) : أميري ، اميري ماينفعش ، أناا أنا عايزة أشوفه يا ملك أرجوكي

ملك ( بتحاول تهديها ) : أنا مش فاهمة حاجه لكن هاعمل لك اللي إنتي عايزاه إتظمني

بتأخدها في حضنها وبتفضل تقرا لها قرآن لحد ما حور بتروح في النوم ،

لكن ملك بتفضل صاحية وغصب عنها بتفتكر

فلاش باك

ملك ( بتتصل بحور وهي مبسوطة وبتقول لها ) : حور أنا عاملا لك مفاجأه خطييرة

حور ( بفرحة ) : قولها طيب

ملك : وتبقى مفاجأه إزاي لو قولتها

حور : بطلي غلاسة بقى يا ملك في إيه

ملك : طب اطلي لي عند الدار من بره

حور : في إيه يا ملك ، إوعي تيجي لوحدك ، خليكي وأنا هاجي أخذك

ملك : إخلصي أنا بره

حور : حاضر طالعة حالاً

وبتطلع وهي عماله تفكر يا ترى في إيه وملك جاية عند الدار ليه

بتخرج وأول ما بتشوفها بتلاقي ملك بتقولها العملية نجحت يا حور ، أنا شايفاكى دلوقتي لابسك شيميز وجيبة

ونقاب وكله إسود ، إيه السواد دا يا بنتي

حور بتفرح جدا وبتحضنها وبتقول لها : الف حمد لله على سلامتكم يا قلبي، عملتها امتي؟؟

ملك : أنا لسه خارجه من المستشفى أول امبارح

حور ( بفرحة ) : حمد لله على سلامتک يا حبيبتى

ملك : هاتسيبينا واقفين في الشارع كدا، تعالى جوة

ودخلت ملك مع حور الدار وسلمت على اللي يعرفوها والكل فرح جداً إنها عملت العملية وبقت بتشوف

وراحوا على أوضة حور وهاجر وكانت هاجر مش موجودة، فضلوا يتكلموا مع بعض وملك تحكيها ومبسوطين أوي، لكن حور مشالتش النقاب من على وشها، ف ملك قالت لها : هو إنتى شايفانى راجل يا بت ولا إيه ، ماتشيلي النقاب بقى ، نفسي أشوف شكلك مفيش حد هنا ، وبتشد النقاب من على وشها بهزار على غفلة منها وبتتصدم وترجع خطوتين لورا وبتقول ( بصدمة ) : إيه دا !!!

بتفوق ملك من أفكارها وبتتبطب على حور وبتقول ( بحنان ) : ربنا هايراضيكي ، كفاية روحك الحلوة وكفاية كل الجمال اللي جواكي ، وبتبوس راسها وبتنام هي كمان.

## الفصل الثامن

بيصحا مهدي من النوم وببروح لأوضة ملك وبخبط ومحدث بيرد عليه فابيعرف إنهم نايمين وبيقدر يدخل  
يتظمن على حور

بيدخل مهدي الأوضة وببلاقي حور نايمة وملك حاضنها ودموعها على خدها ، بياخذها بالراحة من حضن  
ملك عشان مايصحهاش وبيبدأ يلمس على شعرها **ويقول** ( بصوت واطي ) : عارف إنني ظلمتك بسبب شكلك  
اللي مالكيش أي ذنب فيه ، أمك كل يوم بتيجي لي في المنام زعلانة وبتوصيني عليك ، أرجوكي سامحيني  
وسامحي أمك أرجوكي سامحينا يا بنتي

بيبوسها على راسها وببسيب الأوضة ويخرج وهو دموعه على خده **ويقول** لنفسه : أنا ماظلمتهاش لوحدها ،  
أنا ظلمت كل اللي أعرفهم ، سامحني يارب .

وبيبدأ مهدي يحس بصداع فظيع وأفكار كتير بتتزاخم في دماغه ، بيقوم يغسل وشه وببروح شركته عشان  
يشوف آخر أخبار الشغل

\*\*\*\*\*

### عند أدهم

أمير بيروح عند أدهم تاني بعد ما خلص كل اللي كان وراه وببلاقي أدهم ومامته بيستقبلوه بكل حب فابيستأذنهم  
إنه هايدخل يرتاح شوية وبيدخل فعلاً الأوضة ، وبينام وأول ما بيفتح عنيه الصبح ببلاقي رسالة على الموبايل من  
**مجهولته** وبتقوله : أميري صباح الخير ، إمبراح ماكانش يوم فارق بس ، دا كان يوم صعب أوي عليا

وبيقدر لأول مرة يرد على رسالتها **ويقول** لها فيها: عايز أشوفك

وبيجيله الرد طبعاً بسرعه جداً : مش هاينفع

أمير : ليه؟؟

حور : عشان مش هاينفع

أمير : طب ممكن أسمع صوتك

لكن إستنا يجيله رد لكن ما ردتش

فهم في اللحظة دي إنها مترددة وقرر يكسر حاجز الخوف عندها واتصل بيها

\*\*\*\*\*

عند حور

حور نايمة جنب ملك وعماله تفكر ترد عليه ولا لأ ، وهل فعلاً أمير يبقى أخوها ، هي هاترد عليه وبعدها

ربنا يسهل

حور ( وصوتها بيترعش ) : أميري

أمير : أنا مسميكي عندي المجهولة الغربية ، ينفع أعرف إسمك ولا ماينفعش

حور : أنا حور

أمير : إسمك حلو أوي يا حور

حور : شكرا

أمير : ممكن أفهم ليه خرجتيني من المستشفى ، وليه دايماً بتقوليلي أميري ، وإزاي كان معاكي مفتاح أوضتي

حور : مش هاجاوب على كل دا

أمير : ليه

حور : عشان مش مستعدة دلوقت

أمير : طب سؤال تاني ، ليه لما ساعدتيني أخرج ما شوفتكيش

حور ( بدموع ) : قلت لك مش مستعدة أجابو خلاص كفاية بقي كفاية

أمير : براحتك يا حور ، وقت ما تحبي تتكلمي هاسمعك

حور : شكراً ، أنا هاقفل دلوقتي ، سلام

قفلت معاه المكالمة و ملك سألتها : مين دا؟؟

حور : أميري

ملك : يابنتي بقالك حوالي 6 سنين بتقولي أميري ولا عمرنا شوفناه مرة حتى

حور : أحسن ، مش عايزة حد يشوفه غيري

ملك ( بهزار ) : طيب ربنا يوعدنا

بتخرج ملك وتسيبها في الأوضة فابتجيب النوت بتاعتها وبتكتب

بكل الحب هاكتبك

وفوق العشق أنا عشقك

بكل ما فيا هاشتاقك

في لحظة ما أكون وحشاك

بكل مشاعري هاحكيك

وطول الوقت هاستناك

بكل دموعي هابكي لك

لاجل إني أكون وياك

بحبك يا أميري

لكن أنا خايفة ، خايفة أوي يطلع اللي فهمته صح ، وإني طول الوقت دا بحب أمير مهدي الخيال .

وبتقفل النوت بتاعتها وبتقوم وتخرج برة الأوضة .

عند أمير

بعد ما بيقلل معاها بيحاول يمنع نفسه من التفكير فيها لكنه مبيقدرش وبيقوم يجيب النوت بتاعته ويكتب :  
دخلتي قلبي من غير ما تدخلني حياتي ، حبيتك وأنا ماعرفش غير إسمك ، مليانة أسرار وغموض وشفرتك  
صعبة أوي لكن أنا جنبك وهانحلمها ، بحبك يا ، حوري .

وبيقوم يتوضا ويصلي الصبح وينزل وهو عارف كويس هو رايح فين

\*\*\*\*\*

### في مركز الهدى لتحفيظ القرآن

بتوصل حور وبتقول لشادن : شوشو حبيبتي أسفة المرة اللي فاتت قلت لك هاخرج لك ونقعد وكنت متضايقه  
شوية فامعرفتش

شادن : ولا يهمك يا حور أي وقت تحبيه تعالي إقعدني معايا عادي

حور : ربنا ما يحرمني منك يا قمر ، هادخل أنا عشان البنات زمانهم مستنيين

شادن : ماشي ، صحيح يا حور ، في إجتماع بكرة مع مدير المركز الساعه 3

حور : ودا لازم أحضره

شادن : هو طالب إن الكل يبقى موجود

حور : ماشي هاحضره باذن الله ، هادخل أنا بقي

شادن : ربنا معاكي

\*\*\*\*\*

بيوصل أمير للمكان اللي هو عايزه وبيقابل السكرتيرة وبيقولها : وصلي الملف دا لمهدي بيه

رحمة : أقوله مين يا فندم

أمير : وصليه وخلص ، ولا أقولك ، قولي له أمير

رحمة : حاضر يا فندم

ببمشي أمير وببسيبها وبببروح مركز التحفيظ

شادن ( باحترام ) : أمير بيه إتفضل

أمير ( بإحراج ) : لا أنا مستعجل ، لو فاضية ممكن نروح البنك دلوقتي

شادن ( بتأكيد ) : طبعا أكيد بس لحظة هاستأذن زميلتي بعد ما تخلص المجموعة اللي معاها تقعد مكاني

على ما أرجع

أمير : تمام أنا مستنيكي

بتدخل شادن وبتقول لحوور تقعد مكانها نص ساعه بعد مجموعتها وحوور بتوافق

وبتخرج شادن لأمير وبتقول له : أنا جاهزة يا أمير بيه

أمير : ياللا توكلنا على الله

\*\*\*\*\*

في مكتب مهدي الخيال

بتدخل له السكرتيرة وبتقول له : مهدي بيه في حد سابلك الملف دا وقال لي أقول لحضرتك من أمير

مهدي : أمير

رحمة : أيوة يا فنندم

وبتخط له الملف على المكتب وبتقوله : عن إذن حضرتك

بتخرج رحمة من المكتب وبيفتح مهدي الملف وبيتصدم جداً جداً من اللي ببشوفه

\*\*\*\*\*

في البنك



**الموظف :** خلاص كدا يا فندم كدا تم تحويل 220 ألف جنيه من حساب شادن العمري لحساب حضرتك  
أمير ( بشكر ) : تمام يا فندم شكراً ل حضرتك

بيخرج أمير وشادن من البنك وبيقعدوا في كافيتيريا قريبة

أمير : إزاي المبلغ كتير كدا يا شادن

شادن : والله يا فندم دا رزق حضرتك والمركز الفتره اللي فاتت إتعرف والمجموعات بقت أكبر وأكثر من  
الأول بكتير جداً ، لكن أنا رافضة الفلوس اللي حضرتك سيبتها في حسابي ورفضت تاخذها دي

أمير : إعتبريها هدية

شادن : و حضرتك ليه تهاديني بدا كله حضرتك سايلي 30 ألف جنيه في حسابي لأن الأرباح كانت 250 الف

أمير : إعتبريها أي حاجة ، إعتبريها مكافئتك على أمانتك طول السنين دي

شادن ( بشكر ) : شكراً ل حضرتك جداً ، بصراحة مش عارفة أقول لك إيه

أمير : ماتقوليش حاجه وياللا على شغلك زمان زميلتك اللي قاعده مكانك اتأخرت

شادن وافتكرت حور : عندك حق ، عن إذنك

أمير : ماتتسيش تأكدي على كل الموظفين إجتماع بكرة

شادن : حاضر

ومشي أمير لبيت أدهم ومشيت شادن على مركز الهدى.

\*\*\*\*\*

### في مكتب مهدي

**مهدي** قاعد مصدوم من اللي شافه ومش قادر يوقف دموعه أبدا وبيقول بقهرة : يعني حتى أنت يا أمير أنا  
ظلمتك ، أنا ليه ظلمت كل الناس اللي دخلت حياتي ، ظلمت عادة لما إتجوزتها وهي مش عايزاني ، وظلمت  
ملك لما ماعملتهاش العملية وظلمت حور لما رميتها في دار أيتام بسبب حاجه مالهاش ذنب فيها ، وظلمتك ،  
ظلمتك إنت كمان يا أمير ، ظلمتك لما فكرتك سرقتني وعملت العملية لملك من غير إذني ، وظلمتك لما رميتك

في مصحة الأمراض النفسية لمجرد إنك عرفت الحقيقة وإني ليا بنت مرمية في دار أيتام ، ظلمتك لما مديت إيدي عليك لمجرد إنك واجهتني بالحقيقة وقولت لي إني عمري ما حبيتك لأنني مش أبوك ، وفي الآخر بعد كل دا تقدم لي الورق دا ، في الآخر تطلع كل فلوسي في حساب بإسم ملك والعملية إتعملت بفلوسك إنت ، وإنت عارف إنها مش أختك ، لو حد مكانك كان إنتقم مني ، ليه إنت طلعت كدا ، مابقيتش قادر أتحمل عذاب الضمير ، ياريتك ما كنت عملت كدا .

ببمسك مهدي موبايه وبيتصل بأكرم وبيقول له : إقلب لي الدنيا على أمير ، لازم أوصل له في أقرب وقت ، أرجوك يا أكرم ساعدني من غير ما تسأل على أي حاجة وبيقفل من غير ما يسمع منه ولا كلمة

\*\*\*\*\*

### تاني يوم الساعة 3 في مركز الهدى للتحفيظ

بتقعد حور وكل المعلمات والموظفات في المركز وبيستتوا مدير المركز يوصل ولما بيوصل حور بتبرق بصدمة وبتقول بصوتها كله : أميري !!!

## الفصل التاسع

### في بيت مهدي الخيال

بترجع ملك من الكلية وبتدخل أوضتها ، بتدور على حور أو باباها لكن مابتلاقيش حد فابتصلي فرضها وبتقرر تنام شوية على ما يرجعوا .

بتوصل ملك عند السرير لكن بيلفتها نوت مكتوب عليها من برة : حور الأمير

بتمسك النوت وبتلاقي إن المكتوب على النوت من برة خطه مختلف عن اللي مكتوب في النوت جوة ، بفتح أول صفحة وبتلاقي مكتوب فيها : أول يوم ليا النهاردا في مستشفى العباسية أوضة 320 المكان هنا أشبه ما يكون بالقبور ، لكن هنا أكيد أفضل من بيتك يا مهدي .

بتركز شوية وبتأخذ بالها إن دي الأوضة اللي كان أمير فيها ، لكن بتفكر مين اللي جابها هنا ، وليه مكتوب عليها من برة وبتبرق عنيتها بصدمة وبتقول : حور الأمير

بتقلب ملك في النوت لحد نصها تقريبا وبتلاقي إن أمير كان بيكتب فيها أحاسيس بيحسها في المستشفى ، وبيصعب عليها جداً وبتزعل من نفسها إنها كانت بتقسى عليه ، لكن حصل اللي خلاها ترمي النوت من إديها وتحط إيديها على بوؤها تكتم صرخه خرجت منها غصب عنها وهي بتقول : مستحييييل .

\*\*\*\*\*

### في شركة الخيال للاستيراد والتصدير

**مهدي** قاعد في مكتبه وبيتصل بالبنك ويبيدي لهم كل البيانات المطلوبة وبيستعلم عن حساب ملك بنته وبيلاقي فيه فعلاً الفلوس اللي كان فاكر إن أمير سرقها وبيسأل نفسه : لما إنت عملت لها العملية بفلوسك ليه أخذت الفلوس من حسابي وحطيتهم في حسابها ، مش فاهمك يا أمير لكن مش هاظلمك تاني ، هالاقبك وهافهم كل اللي ناقص .

وبيقوم يكلم السكرتيرة وبيقولها : إجتماع شركة GS ها يكون إمتى؟؟

رحمة : كمان ساعة يا فندم

مهدي ( بتعب ) : ينفع يتأجل يا رحمة

رحمة : والله مش عارفة هابعت لهم ميل ولو وافقوا هابلغ حضرتك

مهدي : ماشي أنا هامشي وحاولي تأجليه ولو ما إتأجلش بلغيني

رحمة بتبص له وبتلاقيه عرقان جامد ومش قادر يقف **فبتقول** له : حضرتك كويس يا مهدي بيه

مهدي : أه كويس الحمد لله

وبسيسبها وبينزل وهو بيفكر هايلاقي أمير إزاي وممكن يكون فين

\*\*\*\*\*

## في مركز الهدى

حور أول ما بتشوف أمير بتتصدم جداً وبتقول بصوتها كله : أميري

أمير وقف مصدوم ومش قادر يفهم ، هو الصوت دا طلع منين ، هو دا بجد ولا حلم ، هو في حد سمع اللي

أنا سمعته ؟

وبيفوق من أفكاره على صوت شادن وهي بتقول له : إتفضل يا أمير بيه

بتقف شادن وبتقول بصوت واضح ومسموع : أمير بيه مدير المركز ، كان عنده ظروف بتمنعه إنه يكون

موجود الفترة اللي فاتت ، ولما رجع بالسلامة حب يتعرف بالموظفات الجداد وعشان كذا عملنا الإجتماع دا

الجميع رحب بيه طبعا وقالو له حمد لله على السلامة إلا هي ، قاعده في زاوية لوحدها وبتترعش وبتدعي

ربنا ان أمير مايطلعش أخوها **وبتقول** لنفسها : أنا كنت مستتية اتأكد بنفسي لكن ربنا جمعنا من غير معاد ،

المفروض أعمل إيه دلوقتي ، المفروض أعمل إيه أنا مش هاقدر على المواجهة دي ، مش هاقدر أقتنع إنك

ممكن تطلع أخويا بعد كل الحب دا ، منك لله يا بابا .

أمير خلص الإجتماع مع الموظفات وحور مافهمتش ولا حرف واحد منه ولا ركزت ولا سمعت حاجه أصلاً ،

بتبص حواليتها لقيت إن الناس بتمشي فقامت عشان تمشي هي كمان لكن إتفاجئت بيه بيقرّب ناحيتها وبيقعد

جنبها **ويقول** ( بهدوء ) : حوري

حور ( بصدمة ) وبتحاول تستوعب الكلمة وبتترد ( باستغراب ) : حورك

أمير ( بهزار ) : ما انتي بتقولي لي أميري ، يبقى أنا أقول لك حوري

حور ( بجدية ) : أنا آسفة إنت بس شبهه وحتى إسمك زي إسمه

أمير : لا أنا هو

حور ( وبتبدأ عنيتها تدمع ) : أنا عارفة إنك هو لكن ماكنتش جاهزة للمواجهة دي ، كنت مأجلة كسرتي

شوية كمان

أمير : كسرتك !!

حور : أيوة ، أنا الوحيدة اللي هاطلع مجموعة من كل دا ، فكنت عايزة أبقى كويسة ولو حتى لفترة مؤقتة ،

لكن ربنا مش رايد يفرحني وجمعنا بسرعة أوي

أمير : طب ممكن نقعد في مكان بعيد عن هنا

حور : ممكن نأجل المواجهة دي شوية يا أمير

أمير : أول مرة تقولي لي أمير بس

حور : ما هو ماينفعش تكون حاجة غير أمير بس

أمير ( وهو مش فاهم حاجة ) : طب خيلنا نمشي من هنا ارجوكي

حور ( وهي بتقوم تروح على شادن ) : شادن أنا مش هاجي المجموعة بكرة

شادن ( وهي بتشاور لها تدخل جوة ) : تعالي لحظة

دخلت حور مكتب شادن ووقفت شادن قدامها وبتقول لها : إيه اللي عملتية دا يا حور

حور ( بدموع ) : غصب عني والله ، لما شوفته ماقدرتش أتحمك في أعصابي

شادن : هو دا أميرك اللي كنتي بتخليني أحدد لك موقعه عشان تظمني عليه

حور ( بتقاطعها ) : أيوة هو يا شادن للأسف

شادن : ليه للأسف دا أمير بيه قمة في الأخلاق

حور : بعدين نتكلم في الموضوع دا ، أنا هامشي دلوقت ، ومش هأقدر أحضر بكرة

شادن : ماشي يا حور ، خلي بالك من نفسك ، وإتظمني محدش من الموظفين أخذ باله مين اللي قال

أميري وخصوصاً إنك وشك مكانش باين فامغيش أي رياكشن عليكي

حور : ربنا يسترها بقي

وسابتها وخرجت من مكتبها وكان أمير مستنيها برة وقال لها : ياللا بينا

حور ( وهي ماشية جنبه ) : هانروح فين ؟

أمير : تعالي بس هانروح أي مكان هادي

حور : تمام

فضلوا ماشيين ومحدش فيهم نطق بحرف لحد ما وصلوا عند كافييه

قال ليها أمير : المكان هنا هادي وكويس ، ها ندخل

حور ( بتحرك له راسها أيوة ويدخلوا فعلاً الكافييه وبيقعدوا في آخر طرابيزة بناء على رغبة حور

بتفضل حور ساكته شوية وبيقطع السكوت دا أمير وبيقول لها : خرجتيني من المستشفى ليه ؟

حور ( وقررت تحكي له كل حاجه على قد ما تقدر ) : ماهونتش عليا أسيبك في مكان أنا أكثر واحدة

جربت تعيش فيه وخصوصاً لما أكون عارفة إنك مش تعبان

أمير : عرفتي منين إني مش تعبان

حور : من ملك ، كانت بتيجي تحكي لي دائماً بما إني صاحبيتها وتقول لي إنها محتارة تساعدك ولا لأ

وخصوصاً إنك إنت اللي عملت لها العملية وبسببك رجعت تشوف من تاني

أمير : وإيه اللي كان مخليها مترددة تساعدني

حور : باباها كان مفهمها إنك عملت لها العملية وسرقت باقي فلوسه وهربت ، وإنك عملت لها العملية

مخصوص عشان تقدر تاخذ باقي الفلوس مش عشان إنك بتحبها

أمير ( بصدمة ومش قادر يتكلم ) : بابا عمل كدا

حور : للأسف أيوة ، وياريته عمل كدا وبس

أمير : في إيه ثاني يا حور

حور : مع الوقت هاتعرف ، كفاية كدا أوي

أمير : عرفتيني منين ؟ وبتحبيني ليه يا حور كل الحب دا

حور : من لما كنت بنت صغيرة بتيجي لملك قبل ما تعمل العملية ،

من أول مرة شوفتك وأنا حسيتك أميري أنا ، غصب عني حبيتك وماكنتش أعرف إن دا هايكون سبب قهرتي وكسرة نفسي العمر كله

أمير : معقول بتحبيني من زمان أوي كدا وأنا حتى مش عارفك

حور : دي حكمة ربنا ، ماكنش لازم تعرف إني بحبك

أمير : جبتي مفتاح أوضتي منين عشان تخرجيني ، وأرجوكي تجاوبي

حور ( بدموع وهي بتفكر نفسها من حوالي 9 سنين وبتقول له ) : هاحكي لك

من حوالي 9 سنين كنت تعبانة شوية وصحيت من حالة الإغماء اللي كنت فيها لقيتني في المصحة وفي نفس الأوضة اللي إنت كنت فيها وعلى نفس السرير ، حاولت كتير أفهم الدكاتره إني مش تعبانة وإن دا ظلم كبير إتعرضت له بسبب حاجه ماليش أي ذنب فيها ، لكن فضلت سنتين أحاول في الفاضي وماحدش ساعدني .

وبدأت تفكر اللي حصل بالطبط

حور ( بقهرة ) : أنا مش تعبانة يا دكتور ، أنا بس مش قادرة أتقبل اللي بشوفه دا ، هم جابوني هنا عشان

يتخلصوا من حقيقتي لكن في الحقيقة أنا مش محتاجة علاج نفسي ، أنا محتاجة علاج لمشكلتي الحقيقية ،

أرجوك ساعدني أخرج من هنا أرجوك

سيف : هاخرجك بس لو إتأكدت إنك فعلاً مش هاتنذي نفسك لو خرجتي

وبتكمل حور لأمير **ويتقول له** : تعبت كثير جداً لحد ما قدرت أهرب واللي ساعدني كان دكتور لسة متعين جديد وهو نفسه دكتور سيف ، بس من حكمة ربنا إني أخذت المفتاح معايا لما هو إداهولي عشان أخرج وماسيبتهوش وماتسألنيش عن السبب لأنني معرفش وماعرفتش غير لما عرفت إنك دخلت نفس المصححة ونفس الأوضة ، جيت وزورتك كذا مرة ، كنت باستناك تمام وأدخل أتطمئن عليك وأقعد أبص عليك وأعطيت لحد ما غيرت النوتة بتاعتك وقررت أظهر في حياتك بشكل مباشر عن طريق السطر اللي في آخر كل صفحة في النوت الجديدة ، شيلت النوت بتاعتك عشان كان فيها ذكريات وحاجات بتوجعك كنت نفسي تنسى وتبدأ من جديد ، لكن مفيش حاجة بتتنسي ، خصوصاً لو وجعت صاحبها أوي

وبدأت حور تعيط جامد **وتقول** : أنا ماكانش نفسي تكون النهاية كدا ، أنا كان نفسي أعيش نهاية من النهايات السعيدة اللي بنشوفها في القصص والروايات ، لكن الواقع حاجة تانية ، من فضلك سبيني أمشي يا أمير **أمير ( بحب )** : كل دا حصل معاكي ، وكل دا حب ليا ، كل دا جمال ، تعرفي إني كمان حبيتك وكتبت لك كثير في النوت الجديدة ، ومن قبل ما أعرف إسمك حتى ، إتعودت عليكي وعلى اهتمامك ورسايك الغربية ، وكلمة أميري منك ، حبيت إختلافك وأخذتي قلبي من غير ما أعرف حتى إسمك وبقيت أستاكي وأستنا أي رسالة منك عشان تطمني وتخليني بخير .

**حور ( بحدّة )** : ماهو دا أكبر غلط ، أكبر غلط إننا حبينا بعض ، الحقيقة لا ينفع أحبك ولا تحبني ، ماينفعش أبدا

**أمير ( باستغراب )** : ليه ماينفعش !! فهميني ليه !!

حور ساكته ومش عارفة تقول ايه

**أمير** : إنطقي ، يعني إيه تخليني أحبك وتهتمي بيا كل الإهتمام دا وفي الآخر تقولي لي ماينفعش ، يعني ينفع تعلقيني بيكي وتهربيني من المستشفى وتخليني أحبك وفي الآخر تقولي مينفعش ، حتى إنتي زيهم ، ليه كدا

**حور ( بعياط )** : ماتظلمنيش زي كل اللي دخلوا حياتي ، ماينفعش لأنني ببساطة حور مهدي الخيال زي ما إنت أمير مهدي الخيال ،

يعني أنا أختك يا أمير مش حورك ولا أنت أميري ، فهمت ليه حبك كان أكبر كسرة ليا في حياتي ، عرفت ليه كنت بأجل المواجهة



ودي كانت آخر كلمة بتنطقها لأنها فقدت الوعي ودموعها لسة بتنزل

---

## الفصل العاشر

أمير بيمسح ليها دموعها وبيشيلها وبيطلع بسرعة على المستشفى وهو بيتصل بأدهم

أمير : أدهم تعالى حالياً على المستشفى أنا معايا حد تعبان

أدهم : حاضر أنا في المستشفى أصلاً

أمير : ماشي أنا جاي

أدهم ( بيقفل مع أمير الخط ) وبيقول : يا ترى مين تعبان وفي إيه ، ربنا يستر .

\*\*\*\*\*

عند ملك

بتتصدم ملك لما بتلاقي إن النوت نصها حور اللي كاتباه ونصها أمير اللي كاتبه ، وبتفهم من المحتوى إن حور الأمير ما هي إلا حور أختها وأمير أخوها ، بتفهم إن حور هي اللي هربت أمير من المستشفى وبيجي في دماغها إنها أكيد هربته عشان يتجوزوا ، ولما دماغها بتوصل للنقطة دي بتتصل بمهدي فوراً وبتطلب منه يجي البيت بسرعة

مهدي ( بخضة ) : في إيه يا بنتي

ملك : تعالى يا بابا من فضلك في مصيبة

وبتنزل تستناه في مكتبه وبعد نص ساعه بيدخل مهدي المكتب وبيقول لها : في إيه يا ملك طمني

ملك ( بقهرة ) : حور أختي بتحب أمير اللي هو أخويا برضو وهي اللي هربته من المستشفى ، إنت متخيل

إن الإخوات ممكن يكونوا دلوقتي متجوزين بسببك ، إنت حاسس بالمصيبة اللي إحنا فيها ؟

مهدي ( براحة ) : إتطني يا ملك ، حتى لو إتجوزوا ، مش ها يحصل حاجة ، إتطني يا بنتي

ملك ( وهي بتحاول تفهم ) : أتطمئن إزاي مش فاهمة حاجة ، من فضلك فهمني وكفاية مفاجآت بقا

مهدي ( بهدوء ) : أمير وحور مش إخوات يا ملك

\*\*\*\*\*

### في مستشفى العباسية للأمراض النفسية

بتدخل رقية وبتسأل عن دكتور سيف وبتقول له ( باحترام ) : السلام عليكم ، أنا طالبة في كلية الآداب قسم علم النفس ومطلوب مني إني أختار حالة أتدرب عليها عشان مشروع التخرج وإخترت آجي هنا لأن بيكون في حالات كتير وكمان في إثنين صحباتي لكن عندهم ظروف فاهيتأخروا شوية ، فهل ممكن تساعدني ؟؟

سيف ( وهو بيتأملها ) : طبعاً إتفضلني

وبياخدها سيف في الدور المخصص للحالات البسيطة وبيتفقوا على حالة وبتدخل رقية ليها .

\*\*\*\*\*

### في قسم الطوارئ

بيدخل أمير ب حور وبيشوفها أدهم للمرة الثالثة وبيفتكر إنه شافها قبل كدا في بيت مهدي ، بيكشف عليها وبيقول له ادهم : البنت دي كل ما أشوفها تكون في حاجة مزعلاها ، لا حول ولا قوة إلا بالله

أمير : إنت شوفتها قبل كدا

أدهم : كانت مع مهدي بيه في بيته من حوالي 3 أيام وكان قلقان جداً عليها ، وبرضو كان عندها إنهيار عصبي ، مين دي يا أمير !!

أمير : حور مهدي الخيال ، البنت اللي رماها زمان وسابها

أدهم ( بصدمة ) : معقول تكون هي دي ، طب تفتكر كانت في بيت مهدي بتعمل إيه

أمير : هي عرفت إن مهدي أبوها مش عارف هو اللي قال ليها ولا عرفت منين ، لكن هي عرفت

أدهم : وإيه اللي حصل خلاها تتعب كدا ، ووصلت لها إزاي ، أنا مش فاهم حاجه !!

أمير : مش وقته بس هي دي البنت المجهولة اللي هربتني من المستشفى

أدهم ( بصدمة ) : دي !!! طب وليه هربتك وتعرفك منين ، لخبطتني

أمير ( وهو بيمسك دماغه ) : مش وقته كفاية أسئلة خلينا نتظمن عليها بس الأول

أدهم : ماتقلش يا صاحبي ، شوية وهاتفوق ، أنا إديتلها مهدى وهاتبقى كويسة إن شاء الله بس لازم تبعد عن أي زعل أو توتر

أمير ( بتهيدة ) : إن شاء الله

بيخرج أدهم من الأوضة وبيسيب أمير مع حور ، ببجيب كرسي ويقعد جنبها ويمسك إيديها ويتأمل كل ملامح وشها من غير النقاب وبيقول : دلوقتي بس فهمت ليه مهدي سابك زمان وأخذني أنا ، وتقريبا فهمت كمان ليه دخلتي المصحة ، فهمت إن كل اللي حواليك وجعوكي ، بس اللي فهمته دلوقتي كمان إن اللي بيحب بيشوف حبيبته ملاك زي ما أنا شايفك دلوقتي ، شايفك حوري وبس ، أنا حبيتك أوي يا حور ، وباعترف إنني عمر قلبي ما دق غير لحبك المختلف اللي عمري ما حسيته غير معاك وجنك ، بحبك .

بيرفع إيديها ويوسها ويقول لها بحب : إظمني أنا مش أخوكي ، أنا أميرك وهاتفولي دايماً حوري

بتبدأ حور تفتح عنينا وتحرك إيديها فابقول لها: حوري حمد لله على السلامة

حور ( بلخبطة ) : أنا فين ؟

أمير : ماتقلش إنتي مع أميرك

بتقوم تقعد وبتلاحظ إنها من غير النقاب وأمير شافها كدا فابتعد على السرير وبتعيط بحرقة وبتقول له ( بصريخ ) : إنت هاتقول إنني مشوهة صح ، هاتشوفني وحشة وهاتبعد عني صح ، إنت هاتتريق عليا وهاتقولي إنني بنص وش ، هاتخاف من شكلي وهاتكره تبص لي ، إنت هاتكمل على اللي هم عملوه ، هاتسييني زي ما أبويا وأمي سابوني ، هاتتصدم زي ما أختي إتصدمت لما شافت شكلي يوم ما عمليتها نجحت ، هاتعمل فيا إيه إنت كمان، أحب أقول لك مابقتش فارقة ، كل حاجة ممكن تتعمل إتعملت فيا ، فبقى الوجد بالنسبالي شيء عادي ، الحمد لله إنك طلعت أخويا ، الأخ مابيسيبش أخته عشان شكلها ، مع إن أبويا وأمي رموني بسببه ، لكن لو ماكنتش أخويا مستحيل كنت ترضى ترتبط بواحدة مشوهة ، أنا فرحانة إنك أخويا ، لا أنا بكذب أنا مش فرحانة ، أنا مقهورة ومكسورة وقلبي مبقاش متحمل أنا عمر قلبي ما دق غير ليك وفي الآخر تطلع أخويا وأنا اللي عشت عمري كله متخيلة إن ماليش أهل ، انتو كسرتوا نفسي وشوهتوا كل حاجة حلوة باقية فيا ، أنا تعبانة أوي يا أمير ، أرجوك ما تطلعش زيهم ، أرجوك ماتسيينيش يا أمير .

بيحط أمير إيديه على بوؤها وبيسكتها وبيقول لها : بس أنا مش أخوكي ، أنا فعلاً أميرك .

حور ( بصدمة ) : مش أخويا ، طب إزاي !!!

أمير : قومي إنتي بس وخفي وأنا هاحكي لك كل حاجة

حور ( وبتتكر شكلها وإنها مش لابسة النقاب ) وبيقول له : طب نقابي لو سمحت

بيديها أمير النقاب وبتلبسه وبيقول له : فهمني بقى يعني إيه مش أخويا

\*\*\*\*\*

عند ملك ومهدي

ملك بتتصدم من اللي سمعته وماغها بتلف ، وبياخدها مهدي بسرعة على المستشفى

وفي قسم الطوارئ

مهدي بيدخل ملك الأوضة ويبص جنبه على أدهم عشان يكشف على ملك لكن بيتصدم لما بيلاقي حور

وأمير مع بعض وبيقول ( بصدمة ) : أمير !!!!

أمير ( بصدمة ) : مهدي بيه !!!!

حور ( وهي بتقوم من مكانها بسرعة ) : ملك مالها

بيدخل أدهم ( وهو بيقول في نفسه ) : مهدي بيه عرف إن حور تعبانة ولا إيه ، يا ترى هنا بيعمل إيه ،

لكن يبص وبيلاقي ملك وقلبه بيبقى هايزج من مكانه

وبيروح على مهدي بلهفة وبيقول : مهدي بيه ملك مالها في إيه طمني

مهدي : والله ما أعرف يا بني بس هي وإحنا بنتكلم مسكت دماغها ووقعت من طولها ، شوفها مالها يا أدهم

ولو في تحاليل ولا حاجة إعملها لها لأن بقالها فترة بتشتكي من الدوخة

أدهم ( بخوف ) : حاضر إن شاء الله خير

بيكشف عليها وبياخذ عينة منها ويعمل لها كل التحاليل عشان يتظمن عليها ، لكن بيتفاجئ إن ملك عندها

كانسر في الدم ، بياخذ التحاليل ودموعه في عيونه وبيقول : هاتبقي كويسة بإذن الله ، هاتبقي كويسة أنا متأكد

بيروح الأوضة اللي هي فيها وبيلاقي مهدي وهور وأمير جنبها ومفيش حد بينطق

بيقطع مهدي السكوت وبيقول : طمني ملك مالها يا أدهم !!

أدهم ( بأسف ) : ملك للأسف عندها كانسر في الدم ، في الحقيقة هو في مرحلة بسيطة وإن شاء الله

تتحسن بالعلاج ، بس بلاش ملك تعرف عشان نفسيتها

مهدي ( وهو مصدوم ) : كانسر !!!

بتنزل دموع مهدي غصب عنه وبيعيط بحرقة وبيقول : عقاب ربنا

بتقرب منه حور وبتقول له : هاتبقى كويسة بإذن الله

أمير بيفضل قاعد ومش قادر ينطق بحرف ، البنت الصغيرة اللي رباها وعمل المستحيل عشانها دلوقتي

عندها كانسر ، قلبه كان موجوع أوي

راح أمير قعد جنبها ومسك إيديها وبيقول لها : هاتقوي وهاتخفي لإنك بطل ، هاتبقي كويسة يا ملك

بتفوق ملك وبيحاولوا مايحسسوهاش بحاجة عشان نفسيتها وبيرجعوا البيت كلهم

حور وملك ومهدي وأمير ومعاهم أدهم .

## في بيت مهدي

بتطلع حور مع ملك أوضتها وبيفضل أمير ومهدي وأدهم تحت

وبيقول مهدي لأمير : أمير ، أنا محتاج أتكلم معاك ، ممكن

أدهم : بلاش دلوقتي يا مهدي بيه أرجوك ، أمير مش مستحمل

أمير ( بحدة ) : روح إنت دلوقتي يا أدهم ، وأنا موافق نتكلم يا مهدي بيه

بيدخل أمير ومهدي المكتب ، وبيمشي أدهم وهو قلقان على صاحبه وعلى ملك ( حب عمره ) .

\*\*\*\*\*

## في أوضة ملك

ملك ( بتقول لـ حور ) : حور إنتي بتحبي أمير فعلاً !!!

حور : إيه السؤال دا

ملك ( بتشاور لها على النوت ) وبتقول لها : بتحبيه ؟

حور : بحبه أكثر من حياتي يا ملك بس خلاص فهمت إنه مينفعش

ملك : ينفع يا حور إتطمني ، بابا هايحكي لك إنتي وأمير كل حاجة

حور : حتى أمير قال إنه ينفع ، خلينا ننزل ونفهم منهم

ملك : سيبهم مع بعض يصفوا القديم ، القديم كان كثير يا حور ، وبعدين ننزل لهم

حور : ماشي يا حبيبتي إرتاحي شوية زمانك مرهقة

ملك : عندك حق .

\*\*\*\*\*

## في مكتب مهدي

بيتكلم مهدي مع أمير وبيعرفه كل حاجة ورغم صدمة أمير إلا إنه قال له : إنت اللي ربيتني وتستاها إني أسامحك حتى لو ضيعت من عمري 4 سنين في مصحة نفسية ، لكن إنت ربيتني وإعتبرتني إبنك 24 سنة ، أنا مسامحك يا بابا

مهدي ( بفرحة ) : ربنا يراضيك يا بني ويجبر بخاطرك

أمير : حيث كدا بقى أنا طالب منك إيد حور

مهدي : أنا موافق طبعا لو هي موافقة لكن أنا محتاج الأول أفهمها هي وملك كل حاجة ونفهم اللي محتاجين نفهمه منهم وبعد كدا نغير لها بطاقتها ونغير بطاقتك وبعد كدا إبقى إتجوز براحتك ، مستعجل على إيه

أمير : بعد إذتك يا بابا هانادي لـ حور وملك عشان في حلقات كتير ناقصاني وناقصاهم ولازم كل حاجه  
توضح

مهدي : اللي تشوفه يا إبنى

بيخرج أمير من مكتب مهدي وبيطلع أوضة ملك وبيفتكر ذكرياته في البيت دا وبيحس بحزن  
لكن بيقول: ربنا هيعوضني

بيخبط أمير وبتفتحله حور وقلبا بيدق بسرعة لما بتشوفه وبتقول له : ملك نايمه

أمير ( وهو بيبيص لها ) : بس أنا مش جاي لملك بس ، أنا جاي لك إنتي كمان

حور ( بكسوف ) : في حاجة !!

أمير : صحي ملك وإنزلوا لمكتب مهدي بيه ، هاتفهمي كل حاجة ناقصاكي ، لازم كل الملفات القديمة تنتقل

حور : حاضر هاصحياها

بيخرج أمير من عندها وبينزل يستاهم في المكتب مع مهدي

\*\*\*\*\*

في بيت رقية

بتقعد تفتكر كلام مامتها إن في عريس متقدم لها وبتفتكر لحظة ما شافته وقالت ( بصدمة ) : دكتور سيف

سيف : أيوة أنا ، وبيقعد على ركه وبيقول لها : تتجوزيني

وبيسألوا بعض على كل اللي عايزين يعرفوه عن بعض وبتتم الخطوبة في سعادة بين الطرفين .

\*\*\*\*\*

في مكتب مهدي

بتنزل حور وملك وبيلاقوا أمير مستنيهم مع مهدي



**مهدي** : إقعدوا إنتو الإنتين

بيقعدوا فعلا وبيبدأ مهدي يقول : أنا اللي هابدأ وهاحكي كل اللي حصل زمان اللي أتمنى تسامحوني عليه

الكل قاعد بيسمع وكل واحدة جواها خوف من اللي هتسمعه لكن الكل ساكتين مستنيين مهدي يتكلم

بيقطع مهدي السكوت وبيقول : بدأ كل دا لما إتولدتني يا حور ، كنا مستنيين ولادتك أنا وأمك جدا ،

لكن لما اتولدتني وشكلك كان مختلف كان الموضوع مش سهل علينا ، فضلتني معانا سنة وكان كل اللي يشوفك

يقول عليكي مشوهة وكنتي دايماً غريبة عن اللي حواليك ، ومنها لله راندا صاحبة أمك إقترحت عليها إننا

نوديكي أي دار لرعاية الأيتام ونكفر عن دا بإننا نتبنى طفل من أي دار رعاية ، الفكرة في البداية كانت مجرد

فكرة بنقول إننا مستحيل نعملها ، لكن مع كتر الكلام ، الشيطان بدأ يوسوس لنا لحد ما نفذنا فعلاً ، والولد اللي

إختارناه من دار الرعاية دا يبقى أمير .

**حور** ( بتتطق بصدمة ) : يعني أمير أصلا مش ...

**مهدي** ( بيقاطعها ) : أيوة مش إبنني ، ومش أخوكي

وبيكمل كلامه وبيقول : عدا سنين لحد ما ملك إتولدت وكانت شبه كيفية ، كنت نفسي أعمل لها العملية

لكن عمليتها كانت مكلفة جداً وفي نفس الوقت مكانتش مضمونة ، خوفت على الفلوس وقلت ربنا لو عايزها

تكون بتشوف ماكنش خلقها كدا ، وكنت ساعتها إتجوزت بعد أمك ما ماتت وهي بتولدك يا ملك ،

وكانت سهى بتشجعني دايماً إنني ماعملش ليكي العملية ، وإن دي حاجة مش مضمونة ، كانت دايماً تقول لي

بكرة الطب يتقدم ويبقي لها عملية مضمونة ، ماتضيعش فلوسك اللي عشت عمرك كله تبني فيها عشان حاجه

مش هاتنجح ، للمرة الثانية غلظت وسمعت كلامها وماعملتهاش وسبيتك مع أمير وسافرت وأنا متطمئن عليكي

معاه ، سافرت وسبيتك سنين كتير أوي وكنت باشوفك كل سنه ممكن مرة وساعات ماكنتش بنزل عشان أشوفك

أصلاً ، ولما قررت أستقر هنا بعد ما أكتشفت إن سهى كانت أسوأ من خيال أي انسان ، لقيت أمير عمل لك

العملية اللي أنا كنت رافض أعملها ولقيت إن حسابي إتسحب منه 3 مليون مع إن عمليتك كانت تكلفتها أقل ،

قررت أرجع بعد ما عرفت بكل الفلوس اللي إتسحبت من حسابي دي ولسوء حظي لحقت أمير قبل ما يهرب ،

وقال لي وقتها إنني عمري ما حبيته لأنني مش أبوه ، وقال لي كلام كتير وجعني فهمت منه إنه عرف إن ليا

بنت وسبتها وعرف كمان إنه مش إبنني ، أخذته سنتين وشغلته في كل حاجة ممكن ترمطه ولما إتحمل

وماشتكاش ، رميته في المصحة عشان أكسره زي ما كسرتي قدامك يا ملك وعمل لك العملية بعد ما أنا رفضت أعملها ، ولما قلت لك إنه سرقني أنا مكنتش أعرف إن دا ماحصلش غير إمبارح .

ودخل مهدي في نوبة عياط هيسيري وفضل يقول لهم أرجوكم سامحوني أنا غلطت جامد أوي ، أنا ظلمتكم كلكم أرجوكم سامحوني

أمير ( بيحاول يهديه ) ويقول له : كلنا غلطنا في حق بعض هدا يا بابا

مهدي ( بيعيط ) ويقول له : لسة بتقولي بابا

أمير : إنت اللي رببتي ومحدث غيرك ينفع أقول له بابا

مهدي : أنا الي ماستاهلش إنكم تكونوا ولادي

ملك وحرور ساكتين ومصدومين جداً ويبسمعوهم

بيقطع أمير السكوت وبيقول : أنا بقى لما بابا سافر وسابلي ملك ، كنت حاسس إن الحمل ثقيل أوي وإني صغير على المسؤولية دي ومش قدها ، لكن كنت بشتغل ليل ونهار عشان أقدر أعمل لها العملية ، إشتغلت أونلاين عشان أكون معاها أكثر وقت ممكن ، وإشتغلت أوف لاين في الوقت اللي كانت بتبقى فيه في المدرسة ، إشتغلت في أي حاجة وكل حاجة ، عملت حاجات كتير غلط وحرام وكنت ببرر لنفسني إن كل دا عشان ملك ، ظلمت ناس كتير وغلطت كتير وربنا عاقبني أسوء عقاب .

مهدي ( بيقاطعه ) : كفاية يا أمير ، كفاية يا ابني

أمير : لا مش كفاية لازم يعرفوا كل حاجة .

## الفصل الحادي عشر

بيكمل أمير كلامه وعنيه كلها دموع وبيقول : كنت بحاول محاسسهاش بتعبي مهما تعبت عشانها عشان مترعلش ولا تحس إنها حمل ثقيل عليا ، لحد ما جمعت فلوس العملية فعلاً ، لكن قبل العملية بأسبوع كنت داخل المكتب بالصدفة ولقيت جواب على مكنتي اللي هو مكتب بابا من دار الرعاية اللي أخذني منها وبيطالبوه بالشهرية اللي بيدفعها كل شهر ، روحت الدار وفهمت كل حاجة وعرفت إني مش ابنه ، ووقتها خفت إن ملك تطلع مش بنته هي كمان فسحبت من حسابه الفلوس فعلا سحبت 3 مليون وعملت حساب لملك وحطيتهم لها في الحساب ، عشان لو مطلعتش بنته تقدر تعيش وتلاقي حاجة تعيش منها ، أنا ماسرقتش أنا طول عمري بحافظ على فلوسه بس كنت خايف على ملك ومن حبي ليها إتصرفت كدا .

ملك ( بصدمة ) : كل دا حصل يا أمير

أمير : لا مش دا بس اللي حصل كان كتير أوي ، وبيكمل كلامه بدموع :

وقبل العملية بيوم كنت ماشي بالصدفة وشوفت لافتة مكتوب عليها دار الأمل لرعاية البنات الأيتام ، دخلت وأنا قاصد أشوفهم محتاجين إيه وأعمل اللي أقدر عليه يمكن ربنا يسامحني على كل اللي عملته في حياتي ، وكمان كنت قاصد أدفع أي حاجة بنية شفاء ملك ونجاح عمليتها ، لكن يشاء ربنا إني أول ما باقابل مديرة الدار وبتعرف إني أمير مهدي الخيال بتسألني عن بابا وبتقولي بالنص : إنت جاي تشوف أختك ، منتصوروش صدمتي وقتها كانت إزاي وقلت لها أختي مين فاتلخبطت ورفضت تجاوبني ، لكن عرفت من بنت من البنات الموجودين في الدار بعد ما طبعاً إديتلها فلوس كتير عشان توافق تحكي لي ، ورفضت أشوفها يومها لإني ماقدرتش أتحمّل الموقف ، ولإني عرفت إني أخذت مكانها وعشت العيشة اللي هي المفروض تكون عاشتها وهي اللي إتهدلت وإتمرمت في دور الرعاية ، ماقدرتش أواجهها لكن برضو يشاء ربنا إني لما أدخل المصحة تبدل ليا النوته اللي باكتب فيها ، وتظمن عليا وتهتم بيا ، يشاء ربنا إنها تحبني وتهربني من المستشفى عشان ما هونتش عليها .

ملك ( بصدمة ) : معقول كل دا يحصل ، أنا حاسة إني في فيلم هندي

حور : أنا بقا اللي أول حاجة فاكرها من حياتي إني كنت بعيط وباشتكي لمديرة الدار

وبيقول لها : بيقولوا إني مشوهة ، كنت بعيط جامد وكنت فاكرها هاتطبطب عليا

لكن بكل قسوة الدنيا قالت لي : وهو غلط في إيه يعني مانتي وشك مايتشافش ، دا العيال بيخافوا منك ،  
إمشي إطلعي على أوضتك ولما يبقى في زيارات بعد كدا ماتخرجيش بنص وشك دا ، فاهمة ولا لأ .. ؟  
طلعت يومها على أوضتي وفضلت أعيط لحد ما نمت مكاني من العياط ، وفضلت أتعرض للمواقف دي  
كل يوم وساعات كان اليوم بيكون فيه أكثر من موقف ، لحد ما بقي يجي لي نوبات وتشنجات وتعبت جداً  
وكنت بابقى مش في وعيي ولا في حالتي الطبيعية لما حد بيقول لي كدا .  
دخلت المدرسة متأخرة 6 سنين واللي قدي كانوا في إعدادي لكن صممت ودخلت لكن كنت بخاف أروح عشان  
الكلام اللي باتعرض له ، مديرة الدار حبستني وكننت باروح المدرسة على الإمتحانات وبس ، كان أي حد مهم  
يجي يزور الدار تحبسني وتقل عليا بالمفتاح ، فضلنا على كدا لحد ما كبرت ، ورغم إنني كنت شاطرة إلا إنني  
مكنتش باشتراك في أي مسابقات ولا كان في أي حد بيدعمني ، إشتغلنا وإتمرمطنا وروحت لوحدي لدكتورة  
وقالت لي إن اللي عندي دا شلل نصفي في الوجه ، ممكن يتعالج لكن هايغوز جلسات علاج طبيعي مكثفة  
وفي منها الجلسات بالكهربا ، روجت جلسات كتير وكننت باخلي كل فلوسي للعلاج لكن ماقدرتش أكمل علاج  
بسبب إن الست اللي كنت باشتغل في بيتها توفت ومالقيتش شغل ثاني وخصوصاً إنني كنت لسة في ثانوي ،  
دخلت في حالة نفسية صعبة أوي والدار ما صدقوا ودخلوني المصحة ، فضلنا فيها سنتين وفي الآخر هربت  
بمساعدة دكتور كان لسة جديد لما إتاكد من سلامة عقلي ، وبعدها قررت أدخل كلية الآداب قسم علم النفس  
ولبست النقاب ومابقيتش أشيله أبداً وحاولت أتأقلم ، ويشاء ربنا إن أمير يدخل نفس المستشفى ويكون في نفس  
الأوضة ، كننت باروح أزوره دايماً ، كننت بحبه أوي وكل اللي في حياتي عارفين إنني بحب أمير لكن ماكنش  
حد يعرف مين هو ، كننت باستناه ينام عشان مايشوفنيش ولا يسألني عن حاجه مش هاقدر أجابه عليها ،  
وفي مرة شوفته بيكتب في النوت وبيعيط وفهمت إن فيها حاجة بتوجعه ، بدلتها له بنوت ثاني وساعدته يهرب  
من المستشفى لما عرفت إنه معندهوش اللي يخليه موجود في المصحة ، ودا مش كل اللي حصل معايا دا  
إختصار بسيط أوي لكل ثانية عشتها وأنا بداري نفسي من كل اللي حواليا ، كننت دايماً باقول أنا غلظت في إيه  
عشان يحصل معايا كده ، لكن الحمد لله .

بتعيط حور جدا **وبتقول** ( بكسرة ) : بس كسرتي الحقيقية مكانتش كل دا بقي ، دي كانت لما عرفت مين  
أبويا ، إتمنيت إنني ماكنتش ألاقية أبداً عشان ما أفضلش عايشة وصورة أبويا في عيني في الأرض ،  
**وبتكمل** ( بصريخ ) : أنا عمري ما هاقدر أحبك ولا عمرك هاتكون أبويا ، ولو فاهم إنني هاسامحك بإعتذار تبقى

غلطان ، الحالة الوحيدة اللي ممكن تخليني أسامحك هي إنك ترجعلي اللي فات من عمري ، لو تقدر تنفذ أنا كمان موافقة أنسى .

بتقوم حور وهي ( بتعيط ) وبتقول : عن إنكم ، هاطلع على أوضتي مابقيتش قادرة أسمع حاجة أكثر من كذا بتمشي حور وبتتعد ملك على الأرض قدام أمير ( وبتعيط أوي ) وبتقول له : أنا أسفة يا أمير أنا كنت بشوفك بابا قبل ما تكون أخويا عشان كذا صدمتي فيك ووجعتني ، أنا أسفة على قسوتي معاك ، وعلى عدم ثقتي فيك ، أنا أسفة أرجوك سامحني يا أمير .

أمير ( وبمسح على شعرها ) : إنتي مش أختي وبس ، إنتي بنتي ، ماقدرش أزعل منك أبداً يا كوكو ملك ( بفرحة وبتحضنه ) : ربنا يخليك ليا يا أمير

أمير ( بيقول لها ) : إقنعي أختك بقي تتجوزني لاحسن هاخطفها وأتجوزها بالعافية ملك : مش محتاجه إقناع دي واقعه من زمان

أمير بياخذ ملك وبيروحوا عند مهدي وبيبوسوا إيديه وبيقولوا له : ماتقلش يا بابا هتسامحك

بيحضنهم مهدي الإنتين وبيقول لهم : ربنا ما يحرمني منكم أبداً

أمير ( باستئذان ) : طب ممكن أخذ حور ونخرج محتاجين نتكلم

مهدي : مش هاينفع يا أمير إنت إبنني وهي بنتي ، بس خليك هنا أفضل وبعد الخطوبة أبقوا اخرجوا

أمير : حاضر يا بابا ، هاستناك تكلمها وتقول لي رأيها ، يارب توافق

مهدي : هاتوافق بإذن الله يا حبيبي

\*\*\*\*\*

عند أدهم

بيدخل على نهلة وبيحاول يداري حزنه وبيقول لها : إلا مانفسكيش تشوفيني عريس يا نهولة

نهلة : دا يوم المنى بس إنت اللي دماغك جزمة

أدهم : ما هو أصل أنا أصل .....

نهلة ( بابتسامة ) : تبقى عايز تخطب ، أقعد أقعد وقول لي مين دي.. وعرفتها إمتى؟؟؟

أدهم : ملك أخت أمير يا ماما

نهلة : بنت مهدي

أدهم : أخت أمير

نهلة : وبنت مهدي

أدهم : أنا بحبها يا أمي والبنت تربية أمير ف ماتلقيش عليا ، إبنك مش صغير

نهلة : اللي تشوفه ، ربنا يفرحك يا بني

أدهم : هاكلم النهاردا مهدي بيه وهاشوف هايدينا معاد إمتي وهابلغك

نهلة : ماشي يا حبيبي

أدهم : هادخل أرتاح بقى عشان جعان نوم

بيدخل أدهم أوضته وبيتصل ب مهدي ويقول له إنه عايز يقعد معاه هو ومامته وب يخاف جداً ل احسن يكون

أدهم عايز يتقدم ل حور ويقول له : حور هتتخطب لأمير يا أدهم

أدهم : بس أنا عايز أخطب ملك مش حور

مهدي ( بفرحة ) : ملك ، طب إزاي وإنت عارف إنها تعبانة

أدهم : هانتكلم في كل حاجة لما نيجي بس بلاش تجيب سيرة الموضوع دا لوالدتي

مهدي : حاضر يا إبنني ، وأنا هاخذ رأي ملك ، هاستاك بكرة الساعة 9

بيقل أدهم مع مهدي وبمسك صورتها ويقول : هاتبقي بخير بإذن الله يا حبيبي ، وبينام بسرعة من

الإرهاق.

## الفصل الثاني عشر

بتطلع حور الأوضة بعد ما بتسييهم وبتجيب النوت بتاعتها وبتكتب فيها

ولما أول مرة شوفتك

لقيت قلبي بينبض ليك

لقيتني برسم فجأه صورتك

في خيالي ال مليون بيك

لقيتني يوم عن يوم بلاقي

نفسى يعنى مشغولة بيك

لقيتك فجأه بقيت بعيد

وكان حلمي بانى الاقيك

وانك تيجي أشوفك يوم

او حتى في حلم وقت النوم

لحد ما مرة فعلاً جيت

وقلت إنك هترجع يوم

وإن غيابنا مش هايدوم

وقلبك يبقى ليا بيت

وكان حلمي ساعتها بعيد

لكن بردو الأمل بيزيد

بانك يوم هاتيجي عشان

قلبي يعيش معاك في آمان  
وإستتيت شهر وسنين لحد ما جيت  
ولما في يوم لقيتك تاني  
أنا م الفرحة قمت بكيت  
إخيرا هاقدر أتطمّن براحتي عليك  
أخيرا قلبي هايجرب  
يقول لك إنه عايش ليك  
أخيرا روعي هاتقرب  
وتبقى ملك دايماً ليك  
ولما الوقت كان بيعدّي وإنّت قريب  
لكنك بردو كنت بعيد  
وكان العشق ليك بيزيد  
لقيتني بحب فيك أكثر  
وشوقي كان كثير يكبر  
وقلبي راهنني إنك جاي وهاتقرب  
لكن كالعادة كان يخسر  
ماكنتش نفسي أحبك يوم  
لكن قلبي وما يأمر .

وسمعت خبط على باب الأوضة فقفلت النوت بسرعه وقالت : أدخل

بيدخل مهدي عليها ويقول لها : حبيبتني طمنيني عليكي



حور ( من غير ما تبص له ) : أنا كويسة

مهدي : أنا آسف يا حور ، أرجوكي إنسي أرجوكي خلينا نعيش الباقي من حياتنا مبسوطين ، والله هاعالجك يا بنتي وهاعمل كل اللي أقدر عليه عشان تكوني مبسوطة ، بس أرجوكي سامحيني

حور ( بدموع ) : أخرج برة يا مهدي بيه

مهدي ( بيمسح دموعها ) : إنسي اللي فات ، أرجوكي يا بنتي

حور ( بصريخ ) : باقول لك أخرج برة

مهدي بيقوم من مكانه وقبل ما يخرج بيقول لها : أمير طلب إيدك ، أمير كويس يا حور ، وممكن تقعدوا وتتكلما ولو ارتاحتني أقول له إنك موافقة

حور ( بصدمة ) : أمير

مهدي : أيوة ، فكري وردي عليا ، لكن أرجوكي يا حور فكري في إنك تسامحيني كمان وسابها وخرج وجواه احساس فظيع بالندم .

\*\*\*\*\*

بتنزل ملك لمهدي وبتدخل أوضته وبتلاقيه قاعد باصص للسقف ومش مركز في حاجة ف بتقعد جنبه وبتقول : بابا مالك

مهدي : مفيش يا حبيبي ، أمير طلب إيد حور

ملك ( بفرحة ) : دي حور هاتفرح أوي

مهدي : حور موجوعة ومكسورة ورافضة تسامحني يا ملك

ملك : ماتقلتش يا بابا بس طبيعي اللي هي فيه ، اللي هي شافته ماكنش سهل

مهدي : عندك حق ، حاولي تخرجيها من اللي هي فيه

ملك : حاضر يا بابا ، إن شاء الله

وبتقوم من مكانها عشان تخرج بيقولها مهدي : إستتي أنا عايز أأخذ رأيك في حاجة إنتي كمان

ملك : إيه هاتجوزني عم أكرم

مهدي ( بهزار ) : مستعجلة على الجواز أوي إنتي

ملك : أمال إيه يا حاج ، وبتكمل بجدية : في إيه بجد

مهدي : دكتور أدهم صاحب أمير كلمني النهاردا عشان يطلب إيدك

ملك : دكتور أدهم

مهدي : أبوة هو ، هو في غيره

ملك ( بكسوف ) : طب وإنت شايف إيه

مهدي : شايفك موافقة يا سوسة ، دانتي كمان واقعة بقي وأنا مش واخذ بالي

ملك : لأ طبعا خلاص مش موافقة

مهدي : ربنا يفرحك يا بنتي ، إجهزي هايجي بكرة الساعة 9

ملك ( بفرحة ) : حاضر يا بابا

بتخرج ملك من عند مهدي وبتدخل أوضتها بتلاقي حور بتعيط ،

بتأخذها ملك في حضنها وبتقول لها : إهدي بس يا حور ، مالك فيكي إيه

حور : أمير عايز يتجوزني

ملك ( باستغراب ) : وإيه اللي يخليكي تعيطي ، أنا توقعت إنك تفرحي ، دانتي هابلانا كلنا بأميرك ،

لما يطلب يتجوزك يحصللك كدا

حور : خايفة أوي يا ملك ، خايفة يخونني عشان أنا وحشة

ملك ( بهزار ) : إنتي متشحتفة وهارية نفسك عياط عشان كدا ، طب ألحق أقول بقي لبابا إنك موافقة

حور ( وبتمسح دموعها ) : قولي له إني موافقة بس محتاجة أقعد مع أمير الأول ونتكلم  
ملك وهي بتقوم من مكانها ( بفرحة وبتقول بصوت عالي ) : يا أهل الدار حور موافقة تتجوز أمير  
بيخرج مهدي وأمير على صوتها وبيشيلها أمير وبيلف بيها وبيقول لها : أيوة بقى أهي دي الأخبار الحلوة  
مهدي : ربنا يفرحكم ويديمكم سند لبعض يارب.

\*\*\*\*\*

### في أوضة أمير

بيبعث لحور رسالة وبيقول فيها : مبروك يا عروستي ، إيه مش هاتقوليلي تصبح على جنة يا أميري ، ولا  
مابقيتش أنفع

بترد عليه وبتقول له : لأ مش هاقول ، ناام يا أميري عشان بكرة ورانا يوم طويل  
بيشوف الرسالة وبيبعث لها : خلاص هاقولك أنا تصبجي على جنة يا حورية قلبي

حور ( بمشاكسة ) : أنا مش هنام

أمير : طب خلاص أنا طالع لك

حور ( بترد على الرسالة بسرعة ) : إنت مجنون

أمير : إلبسي وإنزلي نقعد شوية في الجنيه ، مستتيكي يا حوري

حور قاعدة وبتفكر تنزل ولا منتزلش وفي الآخر بتلبس وبتقرر تنزل وزى ما تيجي بقى .

\*\*\*\*\*

## في الجنينة

بتنزل حور وبتقعد جنب حوض ورد وبتقعد تكلم الورد وتقول له : كلنا فينا الحلو والوحش دا حتى إنت فيك الشوك رغم كل جمالك ، وبتكتب أمنيتها في ورقة صغيرة وبتطبقها كويس وبتدور وشها عشان تحطها في حوض الورد لكن بتسمع صوت أمير وهو بيقول لها : الورقة دي فيها إيه

حور : حاجة سر

أمير : وفي أسرار على جوزك برضو

حور ( ببلاهة ) : جوزي

أمير : باعتبار ما سيكون يعني

حور : لما يبقى يكون بقي

أمير بينزل جنب حوض الورد وبيأخذ الورقة وبيفتحها وبيلاقي مكتوب فيها :

اللهم اجعل أمير زوجاً لي في الدنيا والآخرة .

بينتقاضي أمير من الأمنية وبيقول لها : للدرجادي

حور : دا أنا باتمنى الأمنية دي من زمان ودايماً برميها في النيل ، أو باحطها في أحواض الورد

أمير : دا أنا جامد أوي وأنا مش واخذ بالي

حور ( بكسوف ) : إمشي بقي إطلع فوق بدل ما أصحي لك ملك

أمير : دي كوكو حبيبتي يعني لو قررت أخطفك هاتخطفك معايا

حور سكتت ومكسوفة

بيقعد أمير جنبها على المرجيحة اللي موجودة جنب حوض الورد وبيقول لها : اسألي

حور : عرفت منين إنني عايزة أسأل عن حاجة

أمير : عيونك قالت لي

حور : إنت عايز تتجوزني ليه

أمير : عشان حبيتك ل حبك لأنه مختلف دخل قلبي من غير أي جهد مني ، حبيتك من أول رسالة ومن أول بحبك يا أميري شوفتها في النوت ، حبيتك ومتسألش إزاي لأن زي ما قولتي ، دي حاجة بتاعة ربنا

حور : ممكن كمان سؤال

أمير : طبعا اسألني

حور : إيه الحاجات الكثير الغلط اللي عملتها وكنت بتقول لما كنا في مكتب مهدي بيه عنها

أمير ( بلخبطة ) : دي مواضيع قديمة وخلصت يا حور ، أرجوكي إقلمي على الماضي وخلينا نبدأ من جديد

حور : بس دا حقي ، أنا مش هاقدر أتحمل وجع ثاني يا أميري ، أرجوك فهمني في إيه

أمير ( بيسببها وبيقوم وبيقول لها ) : تصبحي على خير

ببمشي أمير فعلا وبتفضل حور قاعدة بتفكر إيه اللي ممكن يكون أمير مخبيه وليه حكي كل حاجة إلا دا

ولما حست بالبرد قامت من مكانها وهي بتقول لنفسها : مفيش حاجه بتفضل متدارية ، وطلعت على أوضتها .

## الفصل الثالث عشر

تاني يوم

بتصحا ملك من النوم مبسوطه ومتحمسة جدا وبتصحا حور وبتقول لها : قومي يا حور قومي يا زفتة

حور ( بنوم ) : يا أمير سييني أنام

ملك ( وهي بتصرخ في ودانها ) : بت إنتي ، ماتجنينيش قوميي

بتقوم حور ( تقعد بخضة وبتقول لها ) : في حد يصحي حد كدا

ملك : أيوة أنا .. ياللا قومي ورانا يوم طويل ، في ماسكات عايزة تتعمل وبلاوي

بتقوم حور معاها وبيعملوا كل اللازم وبتقول لها حور : مبروك يا كوكو ، ماتتصويريش قد إيه فرحانة ليكي

بتحضنها ملك وبتقول لها : والله أنا اللي فرحانة إنك إنتي وأمير هاتتجوزوا وهاتبطلي تقرفينا بأميرك اللي

زهقتينا منه دا

بيسمعوا خبط على الباب وبيستأذن أمير يدخل لكن حور بتقول له : ثواني

بتلبس حور نقابها وبتقول له : أدخل

بيدخل أمير وبيبص لـ حور وبيقول لها : إيه القمر دا

ملك ( بتقوم تضربه وبتقول له ) : النهاردا أنا العروسة مش هي

أمير : أحلى عروسة يا كوكو ، أنا جاي عشان أقولك تجهزي أدهم قدامه نص ساعه ويبقى هنا

ملك ( وهي بتطرده ) : طب ياللا برة عشان ألحق ياللا ياللا

بيخرج أمير وبتقف حور تبص عليه فبتقول ملك لها : إنتي لسة هاتبصي ياللا ساعديني أجهز

بتساعد حور ملك وبتقول لها : قمر يا كوكو

\*\*\*\*\*

## في الصالون

بيقعد مهدي وأمير مع أدهم ونهلة ، بيرحبوا بيهم جداً ، وبيتفقوا على كل التفاصيل

ويتقول نهلة : أمال فين عروستنا

مهدي : أمير هاينادي لها حالاً

ويدخل أمير وبينادي لملك فعلا بيقول لها : ياللا يا كوكو أدهم برة ومستتي على نار

ملك ( بكسوف ) : طب إستنا نخرج سوى أنا خايفة

بياخذها من إيديها ويتخرج ملك وهي باصة في الأرض ، بتسلم على نهلة

وبيقولها ادهم وبيقول لها : إزيك يا ملك

ملك ( وهي مكسوفة ) : الحمد لله

ويتقعد ملك جنب أبوها ويببدأ أدهم يقول : بس أنا كان ليا طلب صغير

مهدي : خير يا بني

أدهم : أنا مش عايز خطوبة ، أنا عايز كتب كتاب على طول عشان أبقى براحتي مع ملك ، ويبقى الفرح

بعد شهرين

مهدي ( بحيرة ويفهم إن أدهم بيستعجل عشان يعالجها ) : أقعد مع ملك الأول وإتفقوا ولو إتقنتوا أنا

معنديش مانع

أمير : وأنا كمان

ويخرج أمير ومهدي ونهلة وبيسيبوا ملك وأدهم يتكلموا.

\*\*\*\*\*

\*\*\*\*\*

بيقعد أدهم مع ملك ، ويكون مبسوط جداً ومش مصدق نفسه إن خلاص هايتجوز ملك ، بتسأله عن كل

حاجة محتاجة تعرفها عنه وكل حاجة بنتقي متيسرة جداً

وبعد ما بيخلصوا كلام بيدخل مهدي عليهم هو ونهلة وبيقولوا لهم : الف الف مبروك يا ولاد ، ربنا يفرحكم

وبيقعد مهدي مع نهلة وأدهم ، بيسأل ملك فبتشاور له بعنيها : أيوة ، ف بيقول لهم : على خيرة الله

أدهم : الله يبارك فيك يا عمي

مهدي : إتقتوا على معاد كتب الكتاب

أدهم : إيه رأي حضرتك في الخميس الجاي

مهدي : أنا موافق ، أهم حاجة رأي العروسة ، ها إيه رأيك يا ملك

ملك ( بكسوف ) : اللي حضرتك تشوفه

هنا بيسمعوا زغروطة مصرية أصيلة من نهلة

ويتخرج حور برة وبتحضن ملك وبتقول لها : مبروك يا روجي

\*\*\*\*\*

بعد ما بيمشي أدهم بينادي مهدي على حور وبيقول لها : عايز أتكلم معاك يا حور

حور ( من غير ما تبص له ) : خير يا مهدي بيه

مهدي : إيه رأيك يكون كتب كتاك يوم الخميس مع أختك

حور : ليه !!!

مهدي : عايز أتطمئن عليك يا بنتي وأمير اللي طلب مني أقول لك

حور : هاتكلم مع أمير وأرد على حضرتك

مهدي : ماشي يا بنتي ، مش هاتسامحيني بقى يا حور

حور ( وهي بتمشي ) : عن إذن حضرتك

بتمشي حور من قدام مهدي وبتطلع الأوضة وبتبعت للأمير رسالة وبتقول له : محتاجة أتكلم معاك يا أمير

بيشوف الرسالة وبيتضايق لأنها ما قالتلهاش أميري ، لكن بيرد عليها : هاستأذن مهدي بيه ونخرج



حور : لأ مش عايزة خروج ، عايزة نقعد هنا في الجنينة جنب حوض الورد

أمير : حاضر ، ممكن نتكلم صوت ونخلص بقى من الكتابة دي

حور : لأ إحنا هانتقابل تحت ، إستتاني ، أنا نازلنا لك

أمير : حاضر يا حور

\*\*\*\*\*

بيوصل أدهم البيت وبيتصل ب ملك وأول ما بترد : أيوة مين

أدهم : عاملة إيه يا عروستي

ملك : أدهم

أدهم : طمني عليكي

ملك : الحمد لله

أدهم : مبسوطة

ملك : جدا يا أدهم بس عايزة أطلب منك طلب

أدهم : أمريني يا حبيبي

ملك : أنا مش عايزة أعمل فرح وحاجة إننا نطلع عمرة بدل شهر العسل

أدهم ( وعجبتة الفكرة جداً ) : الفكرة هايلة ، أنا موافق طبعاً

وبفضلوا يتكلموا لحد ما أدهم بيروح في النوم .

بتقلل ملك المكالمة وبتقول لنفسها : يارب أسترنى دائماً وراضيني .

\*\*\*\*\*

بينزل أمير وبيستنا حور جنب حوض الورد مكان ما كانت هي مستتياه المرة اللي فاتت ، بيكتب في ورقة

وبيطبقتها كويس وبيقول لنفسه : يارب قدرني

بتوصل حور عند حوض الورد ويتقعد جنب أمير **ويتقول له** : أخبارك إيه النهاردا

أمير : الحمد لله أنا بخير

بتصله حور **ويتقول له** : ليه سبتني ومشيت إمبارح

أمير : ماقدرتش أتخيل إني ممكن أخسرك بسبب غلطة قديمة ، ماقدرتش أواجهك ف مشيت

حور ( بهدوء ) : إحكي لي يا أميري أي حاجة محتاج تخلص من وجعها ، أنا مستحيل أسيبك إنت مش

عارف إنت عندي إيه ، أنا شايفاك أحسن حد في الدنيا

أمير : ما هو دا اللي واجعني ، لأنك لما تعرفي مستحيل تشوفيني كدا

حور : مش إنت اللي تقرر ، مفيش حاجة في الدنيا قادرة تهز صورتك جوايا ، أرجوك احكي لي يا أميري

أمير مابيقدرش يتكلم لكن بيحط الورقة اللي كتبها في إيدها **ويقول لها** : إقري دي

بتفتح حور الورقة ( وبتقرا اللي فيها بصدمة شديدة جدا ) **ويتقول** : معقول !!!!

## الفصل الرابع عشر

بتقرا حور اللي مكتوب في الورقة ( بصدمة شديدة ) وبتقول : معقول !!!!

أمير : للأسف هي دي الحقيقة ، فهمتي ليه دايماً كنت باقولك إن الجمال مش جمال الشكل ، وإن الروح أهم؟

**حور ساكنه ومش بتتكلم خالص**

أمير : بس إنتي مش هاتسيبيني صح ، والله يا حور مفيش حد في الدنيا يعرف الموضوع دا خالص ، حتى بابا وملك ، ولو ماكنتش قلت لك مستحيل كنتي تعرفي ، لكن أنا حبيت أبدأ حياتي معاكي على الصراحة

حور : أنا مستحيل أسيبك لكن إحكي لي وفهمني ، أنا عايزة أسمعك مش عايزة أشوف ورقة مكتوبة

أمير ( بدموع ) : كنت بشتغل في كل حاجة إشتغلت في المخدرات فترة وفي فترة تانية كنت بهرب سلاح في شحنات طالعة تتبع شركة بابا لما كان سايب لي الشغل ومسافر ، وربنا سترني ولسة ساترني ، لكن أنا مش قادر أعيش حياتي بشكل طبيعي من تأنيب الضمير ، أرجوكي سامحيني يا حور ، والله اتغيرت ..

حور ( بدموع ) : مسامحك يا حبيبي وخلينا ننسى اللي فات ونبدأ مع بعض من جديد .

\*\*\*\*\*

**يوم الخميس**

بينزل مهدي واخذ بناته الإنتين في إيديه وبيقول للمأذون : ياللا يا مولانا

أدهم : أنا الأول

أمير : لأ طبعاً أنا الأول

المأذون ( بيضحك ) : ماتستعجلوش دا الفرق دقائق

وبيبدأ المأذون يكتب كتاب حور وأمير

وأول ما بيقول : بارك الله لكما وبارك عليكما وجمع بينكما في خير ، بتجري حور على أمير وبتحضنه  
أوي وسط ذهول المأذون ومهدي وأمير نفسه وبيقول لها : يا بنت المجانين ، دا أنا إتكسفت

حور : دا أنا ما صدقت .. أنا بحبك أوي يا أميري .. بحبك من زمان أوي أنا بحبك أكثر من كل حاجة  
، أنا عايزة أشوف وشك والمس ملامحك ..... وبتقعد تتكلم كثير وهي مش ملاحظة خالص إن صوتها عالي  
والمأذون بيبيص لها بإستغراب ومهدي ( قاعد بيضحك عليها وبيقول في سره ) : ربنا يفرحك يا بنتي

بيقول أدهم للمأذون : طب مش ياللا يا مولانا أنا عايز أتجوز أنا كمان

نهلة : ماتصبر إنت كمان جرالكم إيه يا ولاد

المأذون : ربنا يفرحهم يارب ، وبيكتب كتاب ملك وأدهم وأول ما بيقول جملته الشهيرة : بارك الله لكما  
وبارك عليكما وجمع بينكما في خير، بيجري أدهم على ملك ويحضنها وبيقول لها : مبروك علينا يا عروستي

وبيقضوا يوم من أجمل الأيام

ومهدي ( بيدعي لهم وبيقول في سره ) : ربنا يفرحكم يا ولادي ويسترها عليكم ، ربنا يشفيكي يا ملك يارب .

\*\*\*\*\*

بيخرج أدهم وملك بعد كتب الكتاب وبيقضوا وقت لطيف

وبيقول أدهم لـ ملك : تعرفي أنا بحبك من إمتي

ملك : من إمتي

أدهم : من يوم ما عيني شافتك وأنا حسيتك هاتبقى حبيبتي ومراتي

ملك : معقول يا أدهم ، ماتخيلتش أبداً إننا في يوم ممكن نتجوز

أدهم : وأدينا إتجوزنا

ملك : الحمد لله

أدهم : مبروك علينا يا حبيبتي

ملك : الله يباركلي فيك يا روعي

\*\*\*\*\*

أمير و حور بيرفضوا يخرجوا وبيطلب أمير من حور إنهم يقعدوا في الجنية عشان هو عايز يشوف وشها وهم برة مش هايبقوا براحتهم عشان النقاب و حور وافقت بسهولة وقعدوا فعلاً في الجنية .

أمير : مسامحاني يا حوري

حور : مسامحك يا نور عيني

أمير ( وهو ضاممها لحضنه وبيقول لها ) : حاولي تسامحيه يا حور ، هو ندمان وربنا عوضنا عن كل

اللي فات وكتبنا لبعض

حور ( بدموع ) : والله مش بمزاجي اللي عشته ماكنش سهل ، سيبيني براحتي يا أمير يمكن الأيام تتسيني

اللي مش عارفة أنساه ووقتها ممكن أقدر أسامح

أمير : إن شاء الله هاتتسي وكل اللي جاي هايبقى سعادة وبس

حور : ما دام جنبك أكيد هايكون سعادة

أمير : طب بصي بقى يا حوري ، أنا كنت مقرر آخذ شقة لنا برة لكن بابا بيتحايل عليا إننا نفضل هنا

معاه لكن أنا قلت له إنني هاخذ رأيك والقرار ليكي

حور : ماينفعش نسيبه لوحده ملك خلاص هاتتجوز ، خلينا هنا يا أميري ، مش فارقة الأماكن لأن في

الحقيقة أي مكان معاك جنة

أمير ( بياخذ إيديها وبيحطها على قلبه وبيقول لها ) : حاسه بيدق قد إيه

حور : حاسة يا أميري

أمير : طب كنت عايز أقولك على حاجه وبلاش تفهميني غلط

حور : مستحيل أفهمك غلط يا حبيبي ، قول

أمير : هانبدأ جلسات علاجك إمتي

وقبل ما تقولي أي حاجه ، أنا بحبك كدا بحبك زي ما انتي وانتي في عيني أجمل بنت في الدنيا ، بس أنا  
عايز أعمل دا عشان أريحك إنتي وتبقي إنتي مبسوطه

حور : يعني بجد يا أمير إنت شايفني جميلة

أمير : مش جميلة وبس ، إنتي في عيني أجمل بنت خلقها ربنا

حور : ربنا ما يحرمني منك يا أميري

أمير : ولا يحرمني منك يا هدية ربنا ليا .

\*\*\*\*\*

## يوم الفرح

بينزل مهدي ماسك إيد بناته الإنتين وببسلم كل واحدة لعريسها

مهدي ( بفرحة ) : مبروك يا ولاد ، الحمد لله إني عيشت وشوفت اليوم دا

ملك وأمير : ربنا يخليك لينا يا بابا

أدهم ( وببسلم على أمير ومهدي ) : طب أنا هاخذ عروستي بقى ونخلع يادوب الطيارة باقي لها ساعة ،

وبيقرب أدهم من أمير وبيقول له : مبروك يا صاحبي

أمير : الله يبارك فيك ، خلي بالك من ملك دي مش أختي بس ، دي بنتي

أدهم : في عنيا يا أمير إتظمن

وبتسلم ملك على حور ( وبتحضرها جدا وبتقول لها ) : هاتوحشيني أوي يا حور ، خلي بالك من نفسك يا

حبيبتي ، ومبروك عليك أميرك

بتخبطها حور ( بهزار وبتقول لها ) : مبروك يا كوكو

ببسلم أدهم على مامته وبتدعي له وبتقول له : خلي بالك من نفسك ومن عروستك يا حبيبتي ، خلي بالك

منه يا ملك

ملك ( وهي بتسلم عليها ) : في عيوني يا ماما

وبيسافر أدهم ومك فعلا وسط خوف عليها من كل العيلة.

---

\*\*\*\*\*

في الجناح الخاص بحور وأمير

أمير ( بيشيل حور وأول ما بيدخلوا بيفضل يلف بيها ويقول لها ) : أخيرا بقيتي معايا

حور ( وبتخبي وشها في كتفه وبتقول له ) : أنا ماكنتش عمري أتصور إن اللحظة دي هاتيحي في يوم

أمير : الحمد لله يا حوري

حور : الحمد لله يا أمير قلبي

أمير : طب ياللا بينا نصلي ركعتين نبدأ بيهم حياتنا ، إدخلي غيري هدومك وإتوضي وأنا كمان هادخل

حور : حاضر يا حبيبي .

## الفصل الخامس عشر

وبعد 15 يوم

بيدخل أدهم على ملك ويقول لها: ياللا يا كوكو عشان يا دوب نجهز الشنط عشان هنسافر

ملك ( بحزن ) : تعرف يا أدهم ماكانش نفسي أمشي من هنا

أدهم : المكان فعلاً يخطف القلب كفاية البصة للكعبة ، بس إتظمني هاجيبك هنا دائماً

ملك ( وبتحاول تداري تعبها ) : حاضر يا حبيبي

لكن مجرد ما بتقوم تقف ، بتمسك دماغها وبتقع على السرير تاني .

بيتخض أدهم جداً ويقول لها : ملك في إيه إنتي كويسة !!!

ملك : بحاول والله يا أدهم لكن بقالي كام يوم باتعب ومهما آخذ مسكنات مابتعملش حاجة

أدهم ( بيحضنها ويقول لها ) : ماتقلقيش يا حبيبي هاجيب لك حاجة تاخديها دلوقتي وهاتبقي زي الفل بإذن الله

ملك : إن شاء الله ، ممكن تجيب لي موبايلي أكلم حور وبابا أتظمن عليهم

بيديها موبايلها وبيخرج يجيب لها علاج وبيرجع بسرعة وهو يقول لها : حبيبي ياللا عشان تاخدي الدوا

بتاخذ ملك الدوا ( وبتكلم بصوت رايح من التعب ويقول ) : ممكن أحضنك يا أدهم

أدهم وجواه خوف فظيع من خسارتها وحضنها جداً وطول في الحضن أوي

وفجأة مبقاش سامع نبضها بيبعدها عن حضنه عشان يتظمن عليها وإتفاجئ إن ملك خلاص ، ماتت

أدهم ( بصوت بيترعش ) : ملك أنا بلحم ، إنتي ماسبتينيش صح ، أرجوكي قومي يا ملك فوقي ،

ماتسيينيش أنا مش هاقدر أكمل من غيرك ، ملك أنا كنت نفسي أحضنك أكثر ، أنا كنت نفسي نجيب أطفال

وتبقي إنتي مامتهم وبيقوا كلهم شبهك في جمالك وروحك الحلوة ، ملك أنا بكلمك ، إنتي سامعاني صح ، دا

مقلب من اللي بتعملهم فيا دائماً ، وبيبدأ ( يصرخ بقهرة ) ويقول : ملك أنا بكلمك ردي عليا ، ردي عليا ،

ماتسيينيش يا ملك عشان خاطري ماتسيينيش



مهدي قاعد هو وحوور وأمير في بيته بيفطروا فبيجيله تليفون من أدهم فقلبه بيوجعه ويخاف على ملك ويبرد  
بسرعة : صباح الخير يا أدهم يابني

أدهم ( وصوته رايح من العياط ) : صباح النور يا عمي

مهدي : أدهم مالك ، مالك في إيه ، ملك كويسة

أدهم ( ومش قادر يتكلم ) : ملك .....

مهدي : في إيه إنطق

أدهم : ملك البقاء لله يا عمي ، ملك توفت إمبارح بالليل

مهدي ( بصدمة ويقع على الارض ويبصرخ ) : بنتي

بياخذ أمير التليفون من مهدي ويكلم أدهم ويقفل معاه ويقول لحوور : ملك ماتت يا حور ، ماتت وسابتنا  
كلنا ، ماتت ومش هاتقدر حتى نشوفها ولا نودعها ، ملك إتصلى عليها في الحرم في الفجر وإندفنت خلاص  
، ملك خلاص مش هانشوفها ثاني يا حور

أمير ومهدي في حالة انهيار وحوور من الصدمة مش مستوعبة وبتقول ( بلخبطة شديدة ) : ملك مين ، لالا  
مستحيل ، ملك قافلة معايا إمبارح بالليل قبل ما أنام على طول ، وقالت لي أخلي بالي منك ومن بابا ، ملك  
مش هاتسيينا لوحدنا مستحيل ، وبيغمي عليها

بياخذها أمير للمستشفى هي وباباه وحوور بتفوق

لكن للأسف مهدي من الصدمة بيفقد إحساسه برجليه تماما وبتبقى دي الصدمة الثانية لأمير وحوور في نفس اليوم

بتعيط حور جامد وبتقول ( بقهرة ) : ملك فين ؟؟؟ ملك كويسة ودا حلم صح؟

أمير : إهدي يا حور دا قضاء ربنا

حوور : هو مهدي بيه ماله

مهدي ( بضعف ) : ماتقلقيش يا بنتي ، أنا دلوقتي ماليش غيرك إنتي وأمير أرجوكم سامحوني

بتسكت حور وبمشوا من المستشفى من غير كلمة زيادة لكن ومهدي على كرسي متحرك .

\*\*\*\*\*

بتمر فترة وأمير بيروح مع حور جلسات العلاج ومفيش أي نتيجة ،  
وبتقول الدكتورة لأمير : عايزة حضرتك بعد الجلسة

بتخرج حور وبيستتا أمير مع الدكتورة وبيقول : خير يا دكتورة في إيه

الدكتورة : أنا أسفة على الكلام اللي هاقوله بس لازم حضرتك تكون عارف ، حالة المدام علاجها هايأخذ  
فترة طويلة جداً على ما يكون ليه نتيجة متلاحظة لإن دا واضح إنه بقاله كتير معاها فالعصب إتسستم على كدا  
وإحتمالية شفائها تكاد تكون مستحيلة

أمير ( بصدمة ) : مستحيلة !!!

الدكتورة : أنا أسفة جداً بس والله مش بإيدي حاجة

أمير : طب أنا المفروض أعمل إيه

الدكتورة : أهم حاجة تدعمها نفسياً لأن الموضوع دا هايأثر عليها نفسياً جداً ، وبلاش تحسسها بأي شفقة

أمير : طب المفروض أقولها ولا أداري عليها

الدكتورة : لأ .. المفروض تعرف طبعاً عشان ماتعلقش نفسها بأمل تحقيقه شبه مستحيل

أمير : تمام شكراً لحضرتك

بيخرج أمير من عند الدكتورة وهو حزين جداً وخايف من رد فعلها لكن بيقرر يقولها لأنها لازم تعرف .

\*\*\*\*\*

أدهم بيبدأ يتحسن لكن بيقرأ لـ ملك كل يوم ورد من القرآن وبيقول ( بصوت هادي ) : سبتيني قبل ما حتى

تعرفي قد إيه بحبك ، وبيستغفر ربنا وبيحضن صورتها وبيروح في النوم .

\*\*\*\*\*

بيبعد أمير مع حور في مكان هادي وبيقول لها كلام الدكتوراة وهو خايف من رد فعلها ، لكن حور مابتقاش خايفة غير إن أمير يسيبها وبتعيط جدا وبتقول له : بس إنت مش هاتسيبني ، صح ؟

أمير ( بيحضنها ومابيهموش المكان وبيقول لها ) : مستحيل أسيبك إنتي حياتي يا حور

ويبروحوا البيت وبيستغرب مهدي من شكلهم وبيقول : مالكم في إيه ، إنتو متخانقين ولا إيه !!!

أمير : لا يا بابا إتظمن مفيش حاجة

مهدي : في إيه يا حور إحكي لي

أمير بيشاور له يسكت لكن مهدي ببصم يفهم في إيه وبيقول : هو أنا بقيت غريب عنكم

أمير : لأ طبعا يا بابا ، الموضوع كله إن علاج حور هاياخد فترة طويلة شوية عشان نحس بنتايجه

مهدي : فترة طويلة إمتي يعني ؟؟؟

أمير : الله أعلم

بيبص مهدي ل حور وبيبقى حزين جداً من سكوتها وبينهار من العياط وبيقول لها : أنا السبب يا حور أنا

السبب ، لو كنت عالجتك من زمان مكانش زمان دا حصل

حور : للأسف فعلاً إنت السبب ، كان نفسي أقدر أقول لك لأ ، لكن دي الحقيقة

مهدي ( وبمسك قلبه وبيقول لها ) : سامحيني يا بنتي

وبيغمض عنيه ويفارق الدنيا

حور وأمير واقفين مصدومين ومفيش حد فيهم مستوعب اللي حصل

أمير ( بيهز مهدي وبيقول له ) : بابا هو في إيه إنت كويس صح

حور ( وهي منهارة ) : أنا السبب قوم يا بابا وأنا مسامحاك والله بس قوم ماتسيبنيش

ويباخدوه على المستشفى وبيقول لهم أدهم : البقاء لله ، شدوا حيلكم

وبتم مراسم الدفن وحور وأمير الحزن رافض يبعد عنهم

\*\*\*\*\*

### وبعد 3 سنين

أمير : يا حورور تعالي خدي بنتك

حور : ماتخليها معاك يا أمير أنا عندي شغل

ببشيل أمير دينا بنته وبيفضل يسكتها لحد ما بتنام

وبيروح يقعد جنب حور وبيقول لها : الجميل بيعمل إيه

حور : معايا حالات أونلاين بنظم المواعيد عشان الكشوفات

أمير : أحلى دكتوراة في الدنيا

حور : لأ لسة مابقيتش دكتوراة

أمير : لأ أحلى دكتوراة في الدنيا

حور : كله بفضل ربنا وبفضلك ، إنت اللي رجعتي لكل حاجة كانت ضايعه مني ، خليتني أثق في نفسي

وأحب مجال دراستي وأشتغل بيه كمان ، أنا كنت فاكرة إن الدنيا هاتقف على إني مش هاتعالج لكن وجودك

جنبي ودعمك ليا هون عليا كتير ، أنا بحبك أوي يا أميري ووجودك مش بس رجعلي تقتي في نفسي بس ، دا

إنت رجعت لي الحياة

بببص أمير على الشاشة وبيقول لها : إنتي بتشتغليني وبتقولي بنظم مواعيد وإنتي قاعده بتلعي ، إيه اللي

إنتي فاتحاه دا يا هانم

حور ( بهزار ) : هو الواحد ميعرفش يفاجئك أبداً ، طيب كنت بكتب لك يا أميري

أمير ( بفرحة ) : وريني كاتبة إيه يا سوسة

حور : إفتح وشوف بنفسك

ببفتح أمير الملف وبيلاقي مكتوب

بحب إيديا لما تكون بتكتب لك

وأحب كلامي لما يكون عشانك بس  
وأحب رسائلي لما تكون بتشتاق لك  
وأحب هدوءك أما يكون كلامك همس  
بحب الورد لما يكون بيشبه لك  
وأحب البحر لما يكون بيستناك  
وأحب العزله لما فيها بفتكرك  
وأحب الفرحة لما في يوم تكون وياك  
بحب أيديك لما في لحظه تحضني  
وأحب سعادتك اللي تبان في لحظه فيها بتشوفني  
وأحب الرعشه في كلامك ولما تكون مطمئي  
وأحب عياطي لما يكون عشان مثلا بتوحشني  
بحب سكوتك المليان بأحلى كلام  
وأحب النوم لإن بتيجي في الأحلام  
وأحب القلب لما يكون بينده لك  
وأحب الروح لما تكون بتحتاج لك  
بحبني  
لأنني إنت  
ولا ينفع أكون غير بيك  
لأن سعادتي دايمًا ناقصه  
وما بتكمل في يوم غير بيك

عايزه أقول لك إنك إنت ، كل الدنيا واللي فيها

عايزه أقولك أن عشقك فرحه دائماً عايشه بيها

ولا صوتك وإبتسامتك

ولا بارفانك وصورتك

ولا كل تفصيله فيك

إنت يعني أمير حنين

حتى يعني لو مش مبين

إختلافك أمر بين

وحظي الحلو إني الاقبيك

مفيش حاجه هاتبعدني في يوم عنك

ولا حاجه هاتمنعني أكون جنبك

دا وقت ما تبقى مش موجود

بكلم نفسي عن شكلك

وقلبي بيبقى ما له وجود

وجوده بس من قريبك

بحبك أيوه وهاحبك

وكل حياتي دي ملكك

وكل رسائلي علشانك

وكل كلامي من أجلك

بحبك أيوه وهاحبك

وقلبي حقيقي بيقول لك  
بأنه حته من قلبك  
وإن الجاي علشانك  
وإن العشق مكتوب لك  
وإن الراحة والإحساس  
بتبقى بس في حضنك  
بحبك أيوة وماحبك  
ولو كل البشر هاتقول  
بإني فرحتي في بعدك  
هارد بعشقي ليك وهاقول  
بإنك فرحة وقت الحزن  
وإنك ضحكة وقت الضيق  
وإن أمانى بيبقى في حضن  
وإن هواك لقلبي طريق  
ولو كل البشر هاتقول  
بإني فرحتي في بعدك  
هارد بعشقي ليك وهاقول  
يا أحلى فرحة إخترتك  
أمير : كل دا علشانى

حور : إنت عشانك تكون الدنيا كلها مش حته قصيدة ، أنا اصلاً مايعرفش أكتب

أمير : لما إنتي مابتعرفيش تكتبي أنا إيه

حور : ليه هو إنت كتبت لي

أمير : طبعاً ، شوفي يا ستى

حور : لأ أنا مش عايزة أشوف ، عايزة أسمع ، قوللي اللي عايزه بصوتك عشان أحسه

أمير ( بيتتنح وبضحك وبيقول ) : طيب إستحملي بقى

يا دعوة دعيتها آخر الليل

وكانت طالعه من قلبي

يا حلم كبير بسيط وجميل

وفجأه حقه ربي

وكنت حقيقي باتمنى

أشوفك في المنام صدفة

وتيجي ثانية في خيالي

حكيت لعقلي عن عشقك

حكيت لكتابي عن صورتك

ماغبتيش لحظة عن بالي

وكنت بكلم الأيام

وكنت بصاحب الأحلام

وكان قلبي بيتطمئن

عشان شايف سنين قدام



ماكنش في بالي تقرب يوم

ولا إني معاكي أكون

دا إسمك حفظته كتبي

وصوتك كان دوا لقلبي

ورعشة صوتي وأنا بدعي

يارب إجعلني معاها أكون

**بتكمل حور لأمير وبتقول له :**

وجه الوقت اللي فيه تقرب

وجه الوقت اللي أحبك فيه وأكون أقرب

وجه الوقت اللي تحضني وتسمعني

وجه الوقت اللي تشتاقلي وتفهمني

وجه الوقت اللي تدخل جوة تفاصيلي وتعشقتني

وجه الوقت اللي أكون حورك وتستنّي تكون جنبي

وجه الوقت اللي فيه تعرف

بإني عشقت تفاصيلك

وإني كنت بناديلك

وإني حقيقي كنت معاك

وإني سنين وأنا بهواك

وإني حقيقي باتمنى

أدخل فيك وأعيش جواك

وفات الوقت على حبي سنين وسنين

لا قولت في لحظة إني زهقت

ولا حتى سألت الصبر جبته منين

ولسة الجاي وهاحبك سنين جايين

ولسة الجاي وهاحبك

ما دام قلبي بينبض لك

ولسة الجاي وهاحبك

ما دام روحي بتحتاج لك

ولسة الجاي وهاشيلك

في قلبي وجوة نن العين

ولسه الجاي وهاحبك ليوم الدين

أمير : بحبك يا حوري

حور : بعشقتك يا أميري



دینا مختار



رواية  
فعل وشي

للكاتبة / دينا مختار

